



উপমহাদেশে ইউরোপীয়দের আগমন ও ইংরেজ শাসনের সূচনা

ভূমিকা

যুগযুগ ধরে উপমহাদেশের সাথে স্থল ও জলপথে ইউরোপীয় ব্যবসা-বাণিজ্যের যোগাযোগ ছিল। কারণ উপমহাদেশের ধন-সম্পদের আকর্ষণ বিদেশীদের এ অঞ্চলে আসতে আগ্রহী করে তোলে। ফলে বিদেশি বণিকদের মধ্যে প্রতিযোগিতা শুরু হয়। কিন্তু তখন জলপথের বাণিজ্য শুধুমাত্র আরব বণিকদের হাতেই ছিল। পঞ্চদশ শতাব্দীর শেষের দিকে পাশ্চাত্য থেকে উপমহাদেশে পৌঁছবার নতুন জলপথ আবিষ্কৃত হওয়ার ফলে উপমহাদেশ ও দক্ষিণ-পূর্ব এশিয়ার বন্দরসমূহ হতে বিভিন্ন দ্রব্যাদি সরাসরি ইউরোপীয় বন্দরে পৌঁছতো। এভাবে উপমহাদেশের সাথে ইউরোপের প্রত্যক্ষ যোগাযোগ স্থাপিত হয় এবং উপমহাদেশের ইতিহাসে এক নতুন যুগের সূচনা করে; যা পরবর্তীকালে উপমহাদেশের ইতিহাসের ধারাকে পরিবর্তন করে আধুনিক যুগের সূচনা করেছিল। এ ইউনিটের সংশ্লিষ্ট পাঠে ইউরোপীয়দের আগমন, পলাশীর যুদ্ধ, বক্সারের যুদ্ধ, দিউয়ানি লাভ ও দ্বৈতশাসন প্রভৃতি বিষয় আলোচিত হয়েছে।



ইউরোপীয়দের আগমন

উদ্দেশ্য

এ পাঠ পড়ে আপনি —

- উপমহাদেশের সাথে ইউরোপের বাণিজ্যিক যোগাযোগ সম্পর্কে বিবরণ দিতে পারবেন।
- ইউরোপীয় বণিকদের আগমন সম্পর্কে বর্ণনা করতে পারবেন।
- উপমহাদেশে ইউরোপীয় বণিকদের আগমনের ফলে যে প্রতিক্রিয়া সৃষ্টি হয়েছিল তা বর্ণনা করতে পারবেন।

পর্তুগীজ




বাণিজ্যকে মূলধন করে পর্তুগাল থেকে পর্তুগীজরা এ উপমহাদেশে আসলেও ক্রমে তাঁরা সাম্রাজ্য বিস্তারের স্বপ্ন দেখে। পর্তুগীজ নাবিক ভাস্কা-ডা-গামার উপমহাদেশে আসার পরপরই পর্তুগীজরা এ দেশে আসতে শুরু করে। এরপর ১৪৮৭ খ্রিস্টাব্দে বার্থলমিউ দিয়াজ, আলভারেঞ্জ ক্যাব্রাল ও ১৫০৯ খ্রিস্টাব্দে আলবুকার্ক গোয়াতে আগমন করেন। আলবুকার্ক উপমহাদেশে পর্তুগীজ-শক্তির প্রকৃত প্রতিষ্ঠাতা ছিলেন। কলম্বাস এবং ম্যাজিলানও বিখ্যাত পর্তুগীজ নাবিক ছিলেন। উপমহাদেশে আসার অল্পদিনের মধ্যেই তাঁরা এদেশের পশ্চিম উপকূলের কালিকট, চৌল, বোম্বাই, সালসেটি, বেসিন, কোচিন, গোয়া, দমন, দিউ প্রভৃতি বন্দরে, সিংহলের নানাস্থানে এবং বাংলার হুগলী বন্দরে তাঁদের বাণিজ্য কুঠি স্থাপন করেন। তাঁদের নৌ ও সেনাবাহিনী খুব শক্তিশালী ছিল।


শক্তিশালী নৌ ও
সেনাবাহিনী নিয়ে
পর্তুগীজদের আগমন

পর্তুগীজদের বাণিজ্য

পর্তুগীজরা বাংলাদেশের চট্টগ্রামেও বাণিজ্য কুঠি স্থাপন করে এবং কুঠিগুলোকে দুর্গে পরিণত করে। পর্তুগীজরাই প্রথম ইউরোপীয় যাঁরা ব্যবসা-বাণিজ্য ও অন্যান্য কাজে এদেশে সুদূর প্রসারী ও স্থায়ী প্রভাব রেখে গেছে। সুস্বাদু ফল আনারস, পেপে, পেয়ারা, জলপাই, কামরাঙ্গা প্রভৃতি তাঁরাই এদেশে প্রচলন করে। পর্তুগীজরা চীন, ব্রুনাই, মালাক্কা, ওরমুজ, মালদ্বীপ, শ্রীলংকা প্রভৃতি দেশ থেকে মূল্যবান কাপড়, বাদাম, মসলা, রং, কড়ি, কর্পূর এনে উপমহাদেশে বিক্রি করতো আর বাংলাদেশ থেকে সূতী ও রেশমী কাপড়, পাট, তামাক, চামড়া, চাল, ডাল, ঘি, তেল, মধু মোম অন্যান্য দেশে নিয়ে যেত।



ভাস্কো-দা-গামা



আলবুর্কীক

পর্তুগীজরা কেবল ব্যবসা-বাণিজ্যই করত না, তারা এদেশের জমিদার ও প্রতাপশালী বার ভুঁইয়াদের সেনাবাহিনীতে চাকরী করত। আবার সুযোগ পেলেই জুলুম, অত্যাচার ও লুণ্ঠন করতো। অনেক সময় সম্রাট বা নবাবের আইন অমান্য করে বিনা শুল্কে স্বাধীনভাবে ব্যবসা চালাত। এতে তাঁরা মুঘল সম্রাটের বিরাগ ভাজন হন।

পর্তুগীজরা আরও নানা প্রকার অপরাধমূলক কাজ করত। তাঁরা জোর করে এদেশেরই অসহায় বালক-বালিকাদের খ্রিস্টান বানাত। এদেশের মানুষকে ধরে নিয়ে দাস দাসীরূপে বিক্রি করতো বিদেশের বাজারে। পর্তুগীজ সৈন্যরা জোর করে এদেশের মেয়ে বিয়ে করত। তাদের এ অপরাধের মাত্রা বেড়ে গেলে সম্রাট শাহজাহান পর্তুগীজদের এদেশ থেকে বিতাড়িত করেন। সম্রাটের নির্দেশে কাসিম খান তাদের হুগলী কুঠি থেকে বিতাড়িত করেন। সর্বশেষ বাংলার সুবেদার শায়েস্তা খান তাদের চট্টগ্রাম ও সন্দ্বীপ ঘাঁটি দখল করে চিরতরে এ দেশ থেকে উচ্ছেদ করেন।

পর্তুগীজদের অন্যান্য
কার্যকলাপ

ওলন্দাজ বা ডাচ

ওলন্দাজদের বাণিজ্যনীতি

হল্যান্ডের অধিবাসীদের ওলন্দাজ বা ডাচ বলা হয়। ১৬০২ খ্রিস্টাব্দে ওলন্দাজরা জলপথে উপমহাদেশে আসে। প্রাচ্য বাণিজ্যে আধিপত্য বিস্তারের উদ্দেশ্যে হল্যান্ডের একদল বণিক 'ডাচ ইস্ট ইন্ডিয়া কোম্পানি' গঠন করে। তারা কালিকট, নাগাপট্টম, বাংলার চুঁচুড়া ও বাঁকুড়ায় বাণিজ্য কুঠি স্থাপন করে। এছাড়া বালেশ্বর, কাশিমবাজার এবং বরানগরেও তাদের কুঠি ছিল। প্রথমে ওলন্দাজগণ ইংরেজদের সাথে রেশমী সূতা, সুতি কাপড় চাল, ডাল সোরা ও তামাক এদেশ থেকে রপ্তানি করত এবং অন্যদেশ থেকে এদেশে মসলা আমদানি করত। ইংরেজদের সাথে তাদের যে বাণিজ্য চুক্তি হয় তা দু'বছরের মধ্যে ভেঙ্গে গিয়ে বিরোধ দেখা দেয়। অন্যদিকে বাংলার শাসনকর্তাদের সাথেও তাদের প্রবল বিরোধ দেখা দেয়। এ বিরোধ বেশি বেড়ে গেলে ইংরেজগণ ওলন্দাজ কুঠিগুলো দখল করে ফেলে। আর এভাবে ওলন্দাজদের বাণিজ্যিক সুবিধা সম্পূর্ণ বন্ধ হয়ে যায় এবং তাঁরা উপমহাদেশ ছেড়ে মালয়েশিয়া ও ইন্দোনেশিয়ায় চলে যায়। সেখানে তাঁরা উপনিবেশ স্থাপন করে। ফলে এদেশে ইংরেজদের শক্তি বেড়ে যায়। বর্তমান ইন্দোনেশিয়া ওলন্দাজদের কাছ থেকে দ্বিতীয় বিশ্বযুদ্ধের পর সংগ্রামের মাধ্যমে স্বাধীনতা অর্জন করে।

দিনেমার

বাণিজ্য ক্ষেত্রে দিনেমারদের ব্যর্থতা

ডেনমার্কের অধিবাসীদের দিনেমার বলা হয়। ১৬১৬ খ্রিস্টাব্দে দিনেমারগণ উপমহাদেশে বাণিজ্য করার জন্য 'দিনেমার ইস্ট ইন্ডিয়া কোম্পানি' গঠন করে এবং দক্ষিণ ভারতের ত্রিবাঙ্কুরে ও কলকাতার শ্রীরামপুরে তাদের বাণিজ্য কুঠি স্থাপন করে। অবশেষে দিনেমারগণ কোন প্রকার বাণিজ্যিক সফলতা ছাড়াই এদেশ থেকে চিরতরে বিদায় নেয়।

ইংরেজদের আগমন ও ক্ষমতা বিস্তার

স্যার টমাস রো জাহাঙ্গীরের দরবারে আগমন

পর্তুগীজ ও ওলন্দাজ বণিকদের বাণিজ্যিক সাফল্য ও এদেশের বিপুল ধন-সম্পদের বর্ণনা ইংরেজ বণিকদের মনে এদেশে বাণিজ্য করার আগ্রহ সৃষ্টি করে। উপমহাদেশে তখন মুগল-সম্রাট আকবরের রাজত্বের শেষ সময়। ১৬০০ খ্রিস্টাব্দে ইস্ট ইন্ডিয়া কোম্পানি ইংল্যান্ডের রানী এলিজাবেথের কাছ থেকে ১৫ বছর মেয়াদী সনদ নিয়ে এদেশে বাণিজ্য করতে আসে। সম্রাট জাহাঙ্গীরের সময়ে তারা ১৬১২ খ্রিস্টাব্দে মুম্বাইয়ের নিকট সুরাটে বাণিজ্য কুঠি স্থাপন করে। ১৬১৫ খ্রিস্টাব্দে ইংরেজ রাজদূত স্যার টমাস রো সম্রাট জাহাঙ্গীরের দরবারে এসে ইংরেজদের বাণিজ্যের জন্য কিছু সুবিধা আদায় করেন। এর পর মসলিপট্টমে ইংরেজদের দ্বিতীয় বাণিজ্য কুঠি স্থাপিত হয়। পর্তুগীজরা বাংলা থেকে বিতাড়িত হলে ইংরেজগণ বালেশ্বরে বাণিজ্য কুঠি স্থাপন করে এবং করমণ্ডল উপকূলে কিছু জমি নিয়ে একটি দুর্গ নির্মাণ করে এবং এ দুর্গই পরে মাদ্রাজ শহরে পরিণত হয়। ১৬৫০ খ্রিস্টাব্দে জলপথে ইংরেজগণ হুগলিতে আসে এবং বাংলার সুবেদার শাহ সুজার অনুমতি নিয়ে ১৬৫১ খ্রিস্টাব্দে সেখানে বাণিজ্য কুঠি নির্মাণ করে। ১৬৫৮ খ্রিস্টাব্দে তারা কাশিমবাজারে আরও একটি কুঠি স্থাপন করে। এরপর ধীরে ধীরে তারা ঢাকা ও মালদহে কুঠি নির্মাণ করে শক্তি বাড়াতে থাকে।

কলকাতা নগরী প্রতিষ্ঠা

এদিকে ইংল্যান্ডের রাজা দ্বিতীয় চার্লস পর্তুগালের রাজার বোনকে বিয়ে করে মুম্বাই যৌতুক হিসাবে পান। ১৬৬৮ খ্রিস্টাব্দে চার্লস বার্ষিক দশ পাউন্ডের বিনিময়ে কোম্পানিকে মুম্বাই ইজারা দেন। বর্তমান মুম্বাই নগর ও বন্দর এখানেই গড়ে উঠে। ১৬৯০ খ্রিস্টাব্দে জব চার্নক ভাগীরথী নদীর তীরে ১২০০ টাকার বিনিময়ে কলকাতা, সূতানটি ও গোবিন্দপুর এ তিনটি গ্রামের জমিদারী স্বত্ব কিনে নেন। পরবর্তীকালে উপমহাদেশের ভাগ্য নির্ধারণকারী দুর্গ ফোর্ট উইলিয়াম এখানেই নির্মিত হয়। ১৭১৭ খ্রিস্টাব্দে সম্রাট ফররুখশিয়ারের অনুমতি নিয়ে ইংরেজগণ বাংলা, মাদ্রাজ ও মুম্বাইয়ে বিনা শুল্কে অবাধ বাণিজ্য করতে থাকে।

ফরাসি


ফ্রান্সের অধিবাসী ফরাসিরা ইউরোপের একটি সুসভ্য জাতি। প্রাচীনকাল থেকেই ফরাসিদের সাথে ইংরেজদের বিরোধ ছিল এবং বর্তমানেও আছে। রাজতন্ত্রের বিরুদ্ধে গণতন্ত্র স্থাপনের জন্য ফরাসি বিপ্লব একটি অতি গুরুত্বপূর্ণ ঐতিহাসিক ঘটনা।

উপমহাদেশে ফরাসিদের আগমন সবার শেষে। ১৬৬৪ খ্রিস্টাব্দে ফরাসি মন্ত্রী কোলবার্টের পৃষ্ঠপোষকতায় 'ফরাসি ইস্ট ইন্ডিয়া কোম্পানি' গঠিত হয় এবং ভারতবর্ষে বাণিজ্য শুরু করে। প্রথমে তারা মুম্বাইয়ের সুরাটে ও পরে পন্ডিচেরীতে কুঠি স্থাপন করে। অল্পদিনের মধ্যেই তারা বাংলার চন্দন নগরে আরও একটি কুঠি স্থাপন করে। এছাড়া কারিকল, মসলিপটম, কাশিমবাজার এবং বালেশ্বরেও তাদের কুঠি ছিল। ফরাসিরা উপমহাদেশে প্রায় একশ বছর বাণিজ্য করে। ইংরেজগণ ১৭৫৭ খ্রিস্টাব্দে ফরাসিদের চন্দননগর এবং ১৭৬০ খ্রিস্টাব্দে পন্ডিচেরী কুঠি দখল করে নেয়। স্বদেশে ইংরেজ ও ফরাসিদের মধ্যে বিবাদের জের হিসেবে এখানেও বিবাদ চলতে থাকে। কিন্তু ইংরেজগণ উন্নততর সামরিক শক্তি ও ষড়যন্ত্রের মাধ্যমে উপমহাদেশের রাজনৈতিক ক্ষমতা দখল করে নেয়। পরপর তিনটি কর্ণাটক যুদ্ধে ফরাসিরা পরাজিত হলে ফরাসিদের সাম্রাজ্য ও বাণিজ্য বিস্তারের স্বপ্ন স্বপ্নই থেকে যায়। ফলে তাদের উপমহাদেশ থেকে বিদায় নিতে হয়।

ইংরেজ ও ফরাসিদের দ্বন্দ্ব
এবং ফরাসিদের পরাজয়

অন্যান্য কোম্পানি

বিভিন্ন ইউরোপীয় বণিকদের বাণিজ্যিক সাফল্যে উৎসাহিত হয় ফান্ডার্সের বণিকগণ The Ostend Company, সুইডেনের বণিকগণ The Swedish East India Company, অস্ট্রিয়ার বণিকগণ The Austrian East India Company প্রভৃতি বাণিজ্যিক প্রতিষ্ঠান উপমহাদেশে বাণিজ্য করতে আসে। কিন্তু তারা তেমন সুবিধা করতে পারেনি।



ভাস্কো দা-গামার পাক-ভারত আগমনের পথ

সার-সংক্ষেপ

প্রাচীনকাল থেকেই স্থল ও জলপথে ইউরোপের দেশগুলোর সাথে বাণিজ্যিক সম্পর্কে গড়ে উঠেছিল। উপমহাদেশে উৎপাদিত সামগ্রী ইউরোপে সমাদৃত হতো। মধ্যযুগে আরব বণিকগণ দক্ষিণ পূর্ব এশিয়া থেকে এদেশীয় পণ্য ইউরোপের ভেনিস, জেনোয়া প্রভৃতি বন্দরে নিয়ে যেত। ১৪৯৮ খ্রিস্টাব্দে আফ্রিকার উত্তরাংশ অন্বেষণ করে ভাস্কো-ডা-গামা যখন উপমহাদেশের কালিকট বন্দরে উপস্থিত হলেন, তখন উপমহাদেশের সাথে ইউরোপীয় দেশগুলোর বাণিজ্যিক সম্পর্ক গড়ে উঠেছিল। পরবর্তীকালে এই জলপথ দিয়েই পর্তুগীজ, ডাচ, ইংরেজ, ফরাসি, সুইডিশ, অস্ট্রিয়ান ও অন্যান্য ইউরোপীয় বণিকগণ ক্রমান্বয়ে উপমহাদেশে এসে বাণিজ্য কুঠি স্থাপন করেছিল।

পাঠোত্তর মূল্যায়ন : ৫.১



নৈর্ব্যক্তিক প্রশ্ন:

- প্রাচীনকাল থেকে উপমহাদেশের সাথে ইউরোপের সম্পর্ক ছিল —
ক. কূটনৈতিক
খ. সামরিক
গ. ঔপনিবেশিক
ঘ. বাণিজ্যিক
- উপমহাদেশে পর্তুগীজ শক্তির প্রকৃত প্রতিষ্ঠাতা ছিলেন —
ক. আলবুকার্ক
খ. ভাস্কো-ডা-গামা
গ. পেদ্রো আলভারেস ক্যাব্রাল
ঘ. ফ্রান্সিসকো-ডি-আলমিডা
- 'ডাচ ইস্ট ইন্ডিয়া কোম্পানি' গঠিত হয়েছিল —
ক. ১৬০১ খ্রিস্টাব্দে
খ. ১৬০২ খ্রিস্টাব্দে
গ. ১৬০৩ খ্রিস্টাব্দে
ঘ. ১৬০৪ খ্রিস্টাব্দে
- ইউরোপীয় জাতিসমূহের মধ্যে সবচেয়ে আগে উপমহাদেশে আসে —
ক. ইংরেজ জাতি
খ. ফরাসি জাতি
গ. পর্তুগীজ জাতি
ঘ. দিনেমার জাতি



সংক্ষিপ্ত-উত্তর প্রশ্ন:

- উপমহাদেশের সাথে পর্তুগীজদের বাণিজ্যিক সম্পর্কের বিবরণ দিন।
- উপমহাদেশের সাথে ওলন্দাজ ও দিনেমারদের বাণিজ্যিক সম্পর্কের বিবরণ দিন।
- উপমহাদেশের সাথে ইংরেজদের বাণিজ্যিক সম্পর্কের বিবরণ দিন।
- উপমহাদেশের সাথে ফরাসিদের বাণিজ্যিক সম্পর্কের বিবরণ দিন।



সিরাজউদ্দৌলা ও পলাশীর যুদ্ধ

উদ্দেশ্য

এই পাঠ পড়ে আপনি—

- বাংলার শেষ স্বাধীন নবাব সিরাজউদ্দৌলা সম্পর্কে বিবরণ দিতে পারবেন।
- পলাশীর যুদ্ধের কারণসমূহ বর্ণনা করতে পারবেন।
- পলাশীর যুদ্ধের ফলাফলগুলো বিশ্লেষণ করতে পারবেন।



সিরাজউদ্দৌলার নবাবী
লাভ

উপমহাদেশের ইতিহাসে আলীবর্দী খান বিশেষ উল্লেখযোগ্য ব্যক্তিত্ব। তাঁর প্রকৃত নাম মির্জা মুহম্মদ আলী এবং তিনি ছিলেন তুর্কি বংশের।

প্রথমে তিনি বিহারের শাসনকর্তা ছিলেন এবং পরে স্থায়ী যোগ্যতা-বলে গিরিয়ার যুদ্ধে বাংলার নবাব সরফরাজ খানকে হত্যা করে বাংলা বিহার ও উড়িষ্যার নবাবী (১৭৪০ খ্রি:) লাভ করেন। তাঁর রাজত্বকালের উল্লেখযোগ্য ঘটনা হলো মারাঠা ও বর্গীদের দমন করা। তিনি ইংরেজদের সম্পর্কে সচেতন ও সজাগ ছিলেন।

আলীবর্দী খানের কোন পুত্র ছিল না; ছিল আমেনা, ময়মুনা ও ঘষেটি নামে তিন কন্যা। ময়মুনা ও আমেনার দুই পুত্র ছিল; কিন্তু ঘষেটি বেগমের কোন পুত্র ছিল না। আলীবর্দী খান আমেনার পুত্র সিরাজউদ্দৌলাকে অত্যন্ত স্নেহ করতেন বিধায় তাঁকেই তাঁর জীবিতকালে বাংলার মসনদের জন্য মনোনীত করে যান। সিরাজ ১৭৩৩ খ্রিস্টাব্দে জন্মগ্রহণ করেন তাঁর পিতার নাম মির্জা মুহম্মদ হাসিম মইনুদ্দীন খান। ১৭৫৬ খ্রিস্টাব্দে নবাব আলীবর্দী খানের মৃত্যু হলে সিরাজউদ্দৌলা বাংলা বিহার ও উড়িষ্যার মসনদে আরোহণ করেন।

নবাব সিরাজউদ্দৌলা


পলাশীর যুদ্ধের কারণ

সিরাজের বিরুদ্ধে ষড়যন্ত্র

সিরাজউদ্দৌলার সিংহাসন আরোহণকে আলীবর্দী খানের অপর দুই কন্যা সহজে মেনে নিতে না পেরে ষড়যন্ত্রের জাল বুনে শুরু করেন। এতে ইফ্কান যোগান ঘষেটি বেগমের দেওয়ান রাজা রাজবল্লভ। সিরাজউদ্দৌলা কৌশলে তাঁর খালা ঘষেটি বেগমকে প্রাসাদে নজরবন্দি করেন ও খালত ভাই শওকত জঙ্গকে যুদ্ধে পরাজিত ও নিহত করে পূর্ণিয়া দখল করেন।

সিরাজউদ্দৌলার বিরুদ্ধে পারিবারিক ষড়যন্ত্র ব্যর্থ হলেও প্রাসাদ ষড়যন্ত্র নতুনভাবে শুরু হলো। একদিকে রাজদরবারের প্রভাবশালী দেশীয় রাজন্যবর্গ ও অপরদিকে ইংরেজ বেনিয়ারা। ষড়যন্ত্রকারীদের মধ্যে হিন্দু মুসলমান উভয় সম্প্রদায়ের লোক জড়িত ছিল এবং সিরাজের বিরুদ্ধে প্রতিনিয়ত ষড়যন্ত্র করে যাচ্ছিল।

ইস্ট ইন্ডিয়া কোম্পানী ও ইংরেজদের অবাধ্যতাঃ বাংলায় বাণিজ্যরত ইংরেজ বনিক সম্প্রদায় সিরাজের সিংহাসনে আরোহনের পর প্রচলিত নিয়ম অনুযায়ী উপটোকন প্রদান কিংবা সৌজন্য সাক্ষাৎ পর্যন্ত করেনি; এতে নবাবের প্রতি ইংরেজের অবাধ্যতাই প্রকাশ পায়। ফলে সিরাজ অপমানবোধ করেন।



ফোর্ট উইলিয়াম দুর্গ

নবাবের আদেশ অমান্যঃ নবাব আলীবর্দী খানের সময়ে ইংরেজগণ বাণিজ্য করার অনুমতি পেলেও দুর্গ নির্মাণ করার অনুমতি পায়নি। কিন্তু সিরাজের রাজত্বকালে দাক্ষিণাত্যের যুদ্ধের অজুহাতে ইংরেজরা কোলকাতায় এবং ফরাসিরা চন্দনগরে দুর্গ নির্মাণ শুরু করলে সিরাজ তাদের দুর্গ নির্মাণ বন্ধ করতে আদেশ দেন। ফরাসিরা এ আদেশ মান্য করলেও ইংরেজরা তা অমান্য করে। ফলে নবাব তাদের উপর অত্যন্ত ক্ষুব্ধ হন।


ইংরেজ কর্তৃক শওকত জঙ্গকে সাহায্যঃ নবাব সিরাজের বিরুদ্ধে খালা ঘষেটি বেগম ও পূর্ণিয়ার শাসক শওকত জঙ্গ বিদ্রোহ ঘোষণা করলে ইংরেজরা নবাবের বিরুদ্ধে তাদের সমর্থন করেন। এতে নবাব ইংরেজদের উপর অসন্তুষ্ট হন।

বাণিজ্যিক সুবিধার অপব্যবহারঃ ইংরেজরা বাণিজ্য শুল্ক ফাঁকি দিয়ে ব্যক্তিগত ব্যবসাতে অবাধে 'দস্তক' ব্যবহার শুরু করলে এদেশীয় ব্যবসায়ীরা অত্যন্ত ক্ষতিগ্রস্ত হয়। বাণিজ্য শর্ত মেনে চলার নির্দেশ প্রদান করলে ইংরেজরা তা অমান্য করে। ফলে নবাব ইংরেজদের প্রতি ক্রুদ্ধ হয়ে উঠেন।

সন্ধির শর্ত ভঙ্গঃ নবাব সিরাজউদৌলার সাথে সন্ধির যাবতীয় শর্ত ভঙ্গ করে ইংরাজরা জনসাধারণের উপর অত্যাচার শুরু করে ও নবাবকে কর প্রদানে অস্বীকৃতি জানায়। ফলে নবাবের সঙ্গে ইংরেজদের সম্পর্কের অবনতি ঘটতে থাকে।

ইংরেজ কর্তৃক কৃষ্ণদাসকে আশ্রয় দানঃ ঘষেটি বেগমের পক্ষ অবলম্বনকারী রাজা রাজাবল্লভের পুত্র কৃষ্ণদাস ও তাঁর পরিবার প্রচুর ধনদৌলতসহ কোলকাতায় পালিয়ে গিয়ে ইংরেজদের আশ্রয় গ্রহণ করে। নবাব সরাসরি কৃষ্ণদাসকে তাঁর নিকট সমর্পণের জন্য নারায়ণ সিংহকে দূত হিসেবে ইংরেজদের কাছে পাঠান। কিন্তু, ইংরেজ গভর্নর নবাবের দূতকে অপমানিত করে বের

করে দেন ও কৃষ্ণদাসকে ফেরত পাঠাতে অস্বীকার করেন। ফলে নবাবের ধৈর্যের বাধন ছিঁড়ে যায়।



পলাশীর যুদ্ধ

পলাশীর যুদ্ধ

কলকাতা দখলঃ নবাব ইংরেজদের ধৃষ্টতায় অতিষ্ঠ হয়ে তাদের শাস্তি দেয়ার জন্য ১৭৫৬ খ্রি: ৪ জুন এক বিরাট সৈন্য বাহিনী নিয়ে কোলকাতা অভিমুখে যাত্রা করেন। পথিমধ্যে নবাব কাশিমবাজারের ইংরেজ কুঠি দখল করেন। নবাবের এ অতর্কিত আক্রমণে ভীত হয়ে গভর্নর ড্রেক ও তাঁর সাথীরা ফোর্ট উইলিয়াম ছেড়ে ‘ফুলতা’ নামক স্থানে আশ্রয় নেয়। ফলে সহজেই

নবাবের কলকাতা দখল

সিরাজউদ্দৌলা কলকাতা দখল করেন ও আলীবর্দী খানের নামানুসারে এর নাম রাখেন ‘আলী নগর’। মি. হলওয়েল ও তাঁর সাথীরা আত্মমর্পণে বাধ্য হন (২০ জুন ১৭৫৬ খ্রি:) আত্মমর্পণের পর কোন ইংরেজের উপর অত্যাচার করা হয়নি।

অন্ধকূপ হত্যা

কথিত আছে নবাবের আদেশে ১৪৬ জন ইংরেজ বন্দীকে ১৮×১৪ চওড়া বিশিষ্ট ছোট কক্ষে রাখা হয়েছিল। জুন মাসের প্রচণ্ড গরমে এদের মধ্যে ১২৩ জন শ্বাসবন্ধ হয়ে মারা যায়। বাকী ২৩ জন কোন রকমে বেঁচে যায়। হলওয়েল কর্তৃক প্রচারিত এ কাহিনী ‘অন্ধকূপ হত্যা’ নামে পরিচিত। ‘অন্ধকূপ-হত্যা’ কাহিনীর পেছনে কোন ঐতিহাসিক সত্যতা খুঁজে পাওয়া যায় না। শুধুমাত্র নবাবের বিরুদ্ধে ইংরেজদেরকে উত্তেজিত করার জন্য এটি একটি কল্পিত-কাহিনী মাত্র।

আলীনগরের সন্ধি

কলকাতা পুনরায় ইংরেজদের দখলে

কলকাতা অধিকার করার পর নবাব সিরাজউদ্দৌলা সেনাপতি মানিক চাঁদকে কলকাতা রক্ষার দায়িত্বে রেখে রাজধানী মুর্শিদাবাদ ফিরে যান। ইতোমধ্যে অন্ধকূপ-হত্যা কাহিনী এবং নবাব কর্তৃক কলকাতা দখলের সংবাদ মাদ্রাজে পৌঁছলে ইংরেজ সেনাপতি ওয়াটসন ও রবার্ট ক্লাইভ মানিক চাঁদের নামমাত্র প্রতিরোধ ভেঙ্গে কলকাতা পুনরায় দখল করে নেন।

আলীনগরের সন্ধি : ১৭৫৭ খ্রি:

এ অবস্থায় নবাব চারদিকে ষড়যন্ত্রের বেড়া জাল লক্ষ্য করে ইংরেজদের সাথে এক অপমানজনক সন্ধি করতে বাধ্য হন। এ সন্ধিই বিখ্যাত ‘আলী নগরের সন্ধি’ নামে খ্যাত। এ সন্ধির শর্তানুসারে নবাব দিল্লীর সম্রাট কর্তৃক ইংরেজদের প্রদত্ত সকল বাণিজ্যিক সুযোগ সুবিধা, যুদ্ধের ক্ষয়-ক্ষতি প্রদান, টাকশাল নির্মাণ এবং দুর্গ সংস্কার করার অনুমতি প্রদান করেন।

উচ্চাভিলাষী ক্লাইভ এতেও নবাবের প্রতি খুশী হতে পারলেন না। তিনি বাংলায় ইংরেজ কোম্পানির স্বার্থ সংরক্ষণের জন্য সিরাজকে সিংহাসনচ্যুত করার লক্ষ্যে কতিপয় স্বার্থান্বেষী, ক্ষমতা লোভী কুচক্রী, দেশদ্রোহী ও বিশ্বাসঘাতক ব্যক্তিদের সমন্বয়ে গঠিত একটি শক্তিশালী দলের সাথে গোপন ষড়যন্ত্রে লিপ্ত হলেন।

ক্লাইভ ও মীরজাফরের ষড়যন্ত্র

নবাবীর লোভে ইংরেজদের সাথে মীরজাফরের গোপন চুক্তি

ইতোমধ্যে ইউরোপে ব্রিটিশ ও ফরাসীদের মধ্যে সপ্তবর্ষব্যাপী যুদ্ধ শুরু হলে সে সূত্রে ধরে নবাবের নিষেধ সত্ত্বেও ১৭৫৭ খ্রিস্টাব্দে ক্লাইভ ফরাসি বাণিজ্য কেন্দ্র চন্দনগর অধিকার করেন। ফলে আত্মক্ষার্থে ফরাসিরা মুর্শিদাবাদে আশ্রয় গ্রহণ করেন। ইংরেজদের এ অশোভন উদ্ধত আচরণের জবাব দেয়ার জন্য সিরাজ দক্ষিণাত্যের ফরাসি সেনাপতি বুসীর সাথে পত্রালাপ করেন। নবাবের এ কাজের গুরুত্ব অনুধাবন করে ক্লাইভ মুর্শিদাবাদের সিংহাসনে সিরাজের পরিবর্তে তার মনোনীত প্রার্থী প্রধান সেনাপতি (আলীবর্দী খানের ভগ্নিপতি) মীরজাফরকে সিংহাসনে বসানোর জন্য ষড়যন্ত্রে লিপ্ত হয়। এ সব ষড়যন্ত্রকারীদের মধ্যে ছিলেন ধনকুবের জগৎশেঠ, নবাবের সেনাপতি মীরজাফর ও রায়দুর্লভ, আস্থাভাজন উমিচাঁদ,

লর্ড ক্লাইভ

নবাব বিরোধী চুক্তি

দেওয়ান রাজবল্লব প্রমুখ। মীরজাফর আলী খান নবাবীর বিনিময়ে ইংরেজদের পৌনে দুই কোটি টাকা প্রদানের অঙ্গীকারে ক্লাইভের সাথে এক গোপন চুক্তি স্বাক্ষর করেন। উমিচাঁদ এ গোপন চুক্তির কথা ফাঁস করার ভয় দেখালে ক্লাইভ তাঁকে প্রচুর অর্থ প্রদানের অঙ্গীকারসহ একটি জাল চুক্তি পত্র তৈরি করেন। ওয়াটসন এ জাল চুক্তিপত্রে স্বাক্ষর করতে অস্বীকার করলে ক্লাইভ নিজেই তাতে স্বাক্ষর করেন।

ক্লাইভের যুদ্ধ ঘোষণা

ষড়যন্ত্র যখন একেবারে পাকা, তখন ক্লাইভ নবাবের বিরুদ্ধে সন্ধি ভঙ্গের মিথ্যা অজুহাতে যুদ্ধ ঘোষণা করেন। নবাব ইংরেজদের দুরভিসন্ধিমূলক কার্যকলাপে আগে থেকেই সচেতন ছিলেন। তাই তিনি ৫০টি কামানসহ ৫০ হাজার পদাতিক ও ১৮ হাজার অশ্বারোহী সৈন্যের এক বিশাল বাহিনী মুর্শিদাবাদের ২৩ মাইল দক্ষিণে ভাগীরথী নদীর তীরে মোতায়েনের আদেশ দিলেন। অন্যদিকে ১৭৫৭ খ্রিস্টাব্দের ২২ জুন ক্লাইভ ৮টি কামানসহ ১,০০০ জন ইউরোপীয় ও ২,০০০ জন দেশীয় সৈন্যসহ পলাশীর আম্রকাননে অবস্থান গ্রহণ করলেন। ১৭৫৭ খ্রিস্টাব্দে ২৩ জুন ভাগীরথী নদীর তীরে পলাশীর আম্রকাননে বাংলার ভাগ্য পরীক্ষা হয়ে যায়। নবাবের সৈন্যবাহিনী যখন দেশপ্রেমিক মীরমদন ও মোহন লালের আক্রমণে প্রায় পর্যুদস্ত তখন মীর জাফর যুদ্ধক্ষেত্রে নীরব দর্শকের ভূমিকা পালন করেন। এ সময় হঠাৎ মীরমদন গোলার আঘাতে নিহত হলে মোহন লাল ও ফরাসী সেনাপতি সিনফ্রে যুদ্ধ চালিয়ে যেতে থাকেন। মীরমদনের মৃত্যু

পলাশীর যুদ্ধ এবং মীর জাফরের বিশ্বাসঘাতকতা

মীর জাফর কর্তৃক যুদ্ধ বন্ধের ঘোষণা

সংবাদে নবাব বিচলিত হন এবং সঙ্গে সঙ্গে প্রধান সেনাপতি মীরজাফরকে ডেকে পাঠান এবং বাংলার স্বাধীনতা রক্ষার জন্য মীরজাফরকে অনুরোধ করেন। বিশ্বাসঘাতক মীরজাফর কুরআন স্পর্শ করে বাংলার স্বাধীনতা রক্ষার মিথ্যা শপথ করেন। এদিকে মোহনলাল ও সিনফের বাহিনী যখন নবাবের বিজয়কে সুনিশ্চিতের পথে নিয়ে যায়, ঠিক সেই মুহূর্তে মীরজাফরের পরামর্শে নবাব যুদ্ধ বিরতির আদেশ দিয়ে বিরাট ভুল করেন।

নবাব বাহিনীর পরাজয়

রণক্লাস্ত নবাব বাহিনী যখন রাত্রিতে বিশ্রামেরত তখন মীরজাফরের ইঙ্গিতে ইংরেজ বাহিনী নবাব শিবির আক্রমণ করে সৈন্যদের ছত্রভঙ্গ করে দেয়। ফলে পলাশীর যুদ্ধক্ষেত্রে নবাব পরাজিত হয়ে পুনরায় মুর্শিদাবাদে ফিরে এসে সৈন্য সংগ্রহের চেষ্টা করে ব্যর্থ হন।

নবাব ধৃত ও নিহত

অবশেষে নবাব স্ত্রী লুৎফুননেসা ও কন্যাকে নিয়ে নৌকাযোগে পলায়নের চেষ্টা করেন। কিন্তু রাজমহলের পথে ভগবান গোলায় ধৃত ও বন্দী হন। তাঁদের মুর্শিদাবাদে নিয়ে আসা হয়। পরে মীরজাফরের পুত্র মীরনের আদেশে মোহাম্মদী বেগ নবাবকে হত্যা করে।

এভাবেই পলাশীর প্রান্তরে দেশ প্রেমের পরাজয় হলো, আর বিশ্বাসঘাতকদের জয় হলো। ফলে ইংরেজদের সমগ্র উপমহাদেশের বিজয়ের পথ প্রশস্ত হলো।

নবাবের পতনের কারণ

পলাশীর যুদ্ধকে একটি বিরাট ও ভয়াবহ যুদ্ধ না বলে একটি খণ্ড যুদ্ধ বলা যায়। কারণ এ যুদ্ধের পরিস্থিতি ও গুরুত্ব বিচার করলে এ যুদ্ধকে কখনই বিরাট যুদ্ধ রূপে চিহ্নিত করা যায় না। পলাশীর যুদ্ধে নবাব বাহিনীর পরাজয়ের পেছনে বেশ কয়েকটি কারণ ছিল :

মীরজাফর ও সহযোগীদের
বিশ্বাস ঘাতকতা

প্রথমত: মীরজাফর ও তার সহযোগীদের বিশ্বাসঘাতকতাই ছিল নবাবের পতনের প্রধান কারণ। বিজয়ের মুহূর্তে প্রধান সেনাপতি হিসাবে তিনি নবাবকে ভুল পরামর্শ দেন ও যুদ্ধ ক্ষেত্রে নীরব দর্শকের ভূমিকা পালন করেন।

সিরাজউদ্দৌলার চরিত্রের
দুর্বলতা

দ্বিতীয়ত: তরুণ নবাবের রাজনৈতিক অদূরদর্শিতা ও বিচক্ষণতার অভাব এবং মাতামহের অত্যাধিক স্নেহ প্রাচুর্যের মধ্যে লালিত পালিত হওয়ায় সিরাজের চরিত্রে কঠোরতা ও দৃঢ়তার অভাব ছিল। ফলে তাৎক্ষণিক পরিস্থিতির মুখে তিনি দিশেহারা হয়ে পড়েন এবং ষড়যন্ত্রের খবর পাওয়া সত্ত্বেও তিনি দুর্বলতার কারণে কারও বিরুদ্ধে কোন ব্যবস্থা গ্রহণ করতে সাহসী হন নাই।

সিরাজের অপরিপক্ব
সমরজ্ঞান

তৃতীয়ত: যুদ্ধক্ষেত্রে সুনিশ্চিত বিজয়কে উপেক্ষা করে নবাবের যুদ্ধ বিরতি ঘোষণা করা তাঁর সমরনীতির অপরিপক্বতার ও পরনির্ভরশীলতার পরিচয় বহন করে যা তাঁর পতনকে ত্বরান্বিত করে।

ইংরেজদের ব্যাপারে
সিরাজের অসতর্কতা

চতুর্থত: এ সময় মানুষের মধ্যে চারিত্রিক দৃঢ়তার অভাব দেখা দিয়েছিল। ফরাসিরা তাঁর বিরুদ্ধে ইংরেজদের ষড়যন্ত্র সম্পর্কে তাঁকে হুঁশিয়ার করে দেয়ার পরেও তিনি তাতে কর্ণপাত করেননি। নবাব আলীবর্দী খানও মৃত্যুর আগে সিরাজকে ইংরেজদের শক্তি বৃদ্ধি সম্পর্কে সতর্ক করে যান।

নবাব পারিষদবর্গের
স্বার্থপরতা

পঞ্চমত: কর্মচারী, সভাসদ, সেনাপতি, ব্যবসায়ী, ধনকুবের ও সৈন্যরা নিজ স্বার্থ সিদ্ধির জন্য জাতীয় স্বার্থকে বিসর্জন দিতেও দ্বিধাবোধ করেনি।

ষষ্ঠত: সিরাজের বিরুদ্ধে ষড়যন্ত্রের মূল নায়ক রবার্ট ক্লাইভ সূক্ষ্ম কূটনীতি, উন্নত রণকৌশল এবং রণসম্মানে নবাব অপেক্ষা অনেক বেশি পারদর্শী ছিলেন। ফলে ক্লাইভের নিকট নবাব সিরাজউদ্দৌলার পরাজয় অবধারিত ছিল।

পলাশীর যুদ্ধের ফলাফল

উপমহাদেশের ইতিহাসে পলাশীর যুদ্ধ একটি বেদনাবহুল খণ্ড যুদ্ধ হলেও এ যুদ্ধের ফলাফল ছিল সদূর প্রসারী। বিশেষ করে, এ যুদ্ধের রাজনৈতিক-অর্থনৈতিক-সামাজিক ও সাংস্কৃতিক গুরুত্ব ছিল অপরিসীম।

প্রথমত: পলাশীর যুদ্ধের ফলে বাংলার শেষ স্বাধীন নবাব সিরাজউদ্দৌলার অকাল মৃত্যু হলে বাংলার স্বাধীনতার সূর্য দীর্ঘদিনের জন্য অস্তমিত হয়।

দ্বিতীয়ত: এ যুদ্ধের ফলে মীরজাফর নামে মাত্র নবাব হলেন, কিন্তু প্রকৃত ক্ষমতা রইলো ক্লাইভের হাতে।

তৃতীয়ত: পলাশীর যুদ্ধের পর উপমহাদেশে ইংরেজদের সার্বভৌমত্ব স্থাপিত না হলেও তারা নতুন নবাবের কাছ থেকে নগদ এক কোটি টাকা এবং চব্বিশ পরগনার বিশাল জমিদারী লাভ করেন। ফলে বাংলার রাজনীতিতে ইংরেজদের যখন তখন হস্তক্ষেপের পথ প্রশস্ত হয়।

চতুর্থত: এ যুদ্ধের ফলে ইংরেজগণ বাংলায় একচেটিয়া বাণিজ্যিক অধিকার লাভ করেন আর এদেশীয় বণিকদের সমাধি রচিত হয়।

পঞ্চমত: এ যুদ্ধে বিজয়ের ফলে ইংরেজরা বাংলাসহ দাক্ষিণাত্যে প্রভাব বিস্তার করে ফরাসি বণিকদের বিতাড়িত করে এবং একচেটিয়াভাবে উপমহাদেশের সম্পদ আহরণ ও ইংল্যান্ডে প্রেরণের ফলে এদেশের আর্থিক মেরুদণ্ড ভেঙ্গে যায়।

ষষ্ঠত: ঐতিহাসিক আর.সি. মজুমদার বলেন, “পলাশীর যুদ্ধ বাংলা তথা সমগ্র উপমহাদেশে ইংরেজদের বিজয়ের পথ প্রশস্ত করে দিয়েছিল। কালক্রমে বঙ্গারের যুদ্ধে (১৭৬৪ খ্রি:) তারা নবাব মীর কাসিম ও মুগল সম্রাট দ্বিতীয় বাহাদুর শাহ জাফরকে পরাজিত করে সমগ্র উপমহাদেশের শাসনভার গ্রহণ করে।

সপ্তমত: এ যুদ্ধের ফলে ইংরেজদের সামরিক শক্তি ও প্রতিপত্তি সম্পর্কে জনগণের মনে উচ্চ ধারণার সৃষ্টি হয় এবং সঙ্গে সঙ্গে কোম্পানির মর্যাদাও বৃদ্ধি পায়।

অষ্টমত: পলাশীর যুদ্ধের পর রাজনৈতিক-অর্থনৈতিক পরিবর্তনের সাথে সাথে উপমহাদেশের সামাজিক-সাংস্কৃতিক ক্ষেত্রেও পরিবর্তন সাধিত হয়। “১৭৫৭ সালের ২৩ জুন তারিখে উপমহাদেশের মধ্যযুগ শেষ আধুনিক যুগের পত্তন হয়েছিল।”

সার-সংক্ষেপ

উপমহাদেশে ইংরেজদের আগমন, বাণিজ্য, সাম্রাজ্য স্থাপন, শাসন-শোষণ এদেশবাসীর জন্য এক কলঙ্কজনক অধ্যায়। এ অধ্যায় ষড়যন্ত্রের, বিশ্বাসঘাতকতার, শঠতার ও শাসন শোষণের অধ্যায়। পলাশীর যুদ্ধে ইংরেজগণ কোন রণ দক্ষতার দরুন নয় বরং এদেশীয় কয়েকজন বিশ্বাসঘাতক ও ষড়যন্ত্রকারীদের দরুনই তাদের কর্তৃত্বের প্রথম ভিত্তি স্থাপন করে। পলাশীর যুদ্ধের ফলে ইংরেজ কর্মকর্তারা বিপুল ধন-সম্পদের মালিক হন যা তাঁদের উপমহাদেশব্যাপী বিশাল সাম্রাজ্য স্থাপনে সহায়ক হয়েছিল।

পাঠোত্তর মূল্যায়ন : ৫.২



নৈর্ব্যক্তিক প্রশ্ন:

- সিরাজউদ্দৌলার বাংলার মসনদ লাভ করায় তাঁর পরিবারের মধ্যে —

| | |
|--------------------|------------------------|
| ক. আনন্দ দেখা দেয় | খ. অসন্তোষ দেখা দেয় |
| গ. যুদ্ধ আরম্ভ হয় | ঘ. বিশৃঙ্খলা দেখা দেয় |
- পলাশীর প্রান্তরে নবাবের পক্ষে প্রাণপণ সংগ্রাম করেন —

| | |
|---------------|---------------|
| ক. রায়দুর্লভ | খ. ইয়ার লতিফ |
| গ. মোহনলাল | ঘ. মীরজাফর |

৩. পলাশীর যুদ্ধে ইংরেজদের সেনাপতি ছিলেন —
 ক. ওয়াটসন খ. ক্লাইভ
 গ. সিনফে ঘ. কর্ণওয়ালিস
৪. ইংরেজগণ আলীনগরের সন্ধি কে —
 ক. মেনে চলে খ. নবায়ণ করে
 গ. অমান্য করে ঘ. ভঙ্গ করে
৫. নবাব সেনাপতি মানিকচাঁদ ইংরেজদের আক্রমণে —
 ক. নীরব থাকেন খ. যুদ্ধ করেন
 গ. পালিয়ে যান ঘ. আত্মমর্পণ করেন



সংক্ষিপ্ত-উত্তর প্রশ্ন:

১. সিরাজউদ্দৌলার সাথে কিভাবে ইংরেজদের বিরোধ বাঁধে?
২. পলাশীর যুদ্ধের বর্ণনা দিন।
৩. আলী নগরের সন্ধি কি?
৪. নবাবের পতনের কারণ কি ছিল?




রবার্ট ক্লাইভ

উদ্দেশ্য

এ পাঠ পড়ে আপনি —

- রবার্ট ক্লাইভের অভ্যন্তরীণ সংস্কারের বিবরণ দিতে পারবেন।
- সেনাপতি, শাসক ও এদেশে ইংরেজ শক্তির প্রতিষ্ঠাতা হিসেবে রবার্ট ক্লাইভের কৃতিত্বের বর্ণনা দিতে পারবেন।



উপমহাদেশে ব্রিটিশ শাসনের ইতিহাসে রবার্ট ক্লাইভের স্থান বিশেষ গুরুত্বপূর্ণ। তরুণ বয়সে মাদ্রাজে ইস্ট ইন্ডিয়া কোম্পানির চাকুরী গ্রহণ করে স্বীয় কর্ম প্রচেষ্টার দ্বারা উপমহাদেশে ইংরেজ শাসনের প্রতিষ্ঠাতা হিসেবে স্বীকৃতি লাভ করেছেন। বস্তুত তাঁর অসাধারণ সাহস, সংকল্প ও রাজনৈতিক প্রজ্ঞার ফলেই এদেশে বাণিজ্যরত ইস্ট ইন্ডিয়া কোম্পানি শেষ পর্যন্ত শাসকের মর্যাদা লাভ করে।

১৭৬৪ খ্রিস্টাব্দে শাসন সংস্কার

বঙ্গারের যুদ্ধের পর কোম্পানির হাতে ক্ষমতা চলে আসে। ধীরে ধীরে কোম্পানির কর্মচারীদের মধ্যে বিশৃংখলা ও দুর্নীতি চরমে উঠে। এ অবস্থায় ইংলন্ডের কর্তৃপক্ষ পুনরায় লর্ড ক্লাইভকে পূর্ণ ক্ষমতা দান করে দ্বিতীয়বার বাংলায় প্রেরণ করে। (১৭৬৫-৬৭ খ্রি:)। কাজেই এদেশে এসে তাঁর প্রধান কাজ হলো ‘অভ্যন্তরীণ সংস্কার’ সাধন করা। এ উদ্দেশ্যে তিনি কতিপয় ব্যবস্থা গ্রহণ করেন।

কর্মচারীদের উৎকোচ গ্রহণ
নিষিদ্ধ

প্রথমত: তিনি কোম্পানির কর্মচারীদের পক্ষে সকল প্রকার উপহার বা উৎকোচ গ্রহণ একেবারে নিষিদ্ধ করেন।

বাণিজ্য সমিতি গঠন

দ্বিতীয়ত: তিনি কোম্পানির কর্মচারীদের ব্যক্তিগত ব্যবসায়ের অধিকার সম্পূর্ণভাবে নিষিদ্ধ করেন। পাশাপাশি কোম্পানির ক্ষতিগ্রস্ত অল্প বেতনভোগী কর্মচারীদের লবণ, সুপারী এবং তামাকের একচেটিয়া ব্যবসা করার জন্য একটি 'বাণিজ্য সমিতি' গঠন করেন। এ প্রতিষ্ঠানের লভ্যাংশ উচ্চ পদস্থ কর্মচারীদের মধ্যে পর্যায় অনুযায়ী ভাগ করে দেয়ার ব্যবস্থা রাখা হয়। একচেটিয়া ব্যবসায়ের ফলে নিত্য-প্রয়োজনীয় জিনিষপত্রের দাম বেড়ে যায় এবং সেই সঙ্গে জনসাধারণেরও দুঃখ দুর্দশা বাড়ে। অবশেষে এ বাণিজ্য সমিতির কাজকর্ম পছন্দ না হওয়ায় 'কোর্ট অব ডাইরেকটরস্' ক্লাইভকে তা প্রত্যাহারের নির্দেশ দেন।

সেনাবিদ্রোহ দমন

তৃতীয়ত: পলাশীর যুদ্ধের পর হতে সৈন্যদের শাস্তির সময়েও দ্বিগুণ ভাতা দেয়া হতো। সেনা-বিভাগের খরচ কমানোর উদ্দেশ্যে লর্ড ক্লাইভ এ ভাতা বন্ধ করে দিলে সেনাবিদ্রোহ দেখা দেয়। তবে তা তিনি কঠোর হাতে দমন করেন। এতে তিনি বহুল প্রশংসিত হন।

ইংরেজ ক্ষমতার প্রতিষ্ঠা হিসেবে

উপমহাদেশে ইংরেজ
ক্ষমতা প্রতিষ্ঠার পথ তৈরি

দ্বিতীয় কর্ণাটক যুদ্ধে পরাজিত হওয়ার পর উপমহাদেশে ইংরেজ শক্তি এক বিশেষ দুর্যোগের মধ্য দিয়ে অতিক্রম করছিল। এ দুর্দিনে ক্লাইভ আর্কট দখল করে দাক্ষিণাত্যে ইংরেজের সম্মান রক্ষা করেন। (১৭৫৯ খ্রি:) ইংরেজের এ বিজয় উপমহাদেশে তাদের ক্ষমতা প্রতিষ্ঠার পথ নির্দেশক হিসেবে কাজ করে।

লর্ড ক্লাইভের দেওয়ানি লাভ

১৭৫৭ খ্রিস্টাব্দে রবার্ট ক্লাইভের কূটনীতির জন্যই পলাশীর প্রান্তরে ইংরেজ পতাকা উত্তোলন সম্ভব হয়েছিল। এ বিজয় ইংরেজ শাসনের ভিত্তিকে সুনিশ্চিতের দিকে এগিয়ে নিয়ে যায়। পরবর্তী কালে বাংলার এ অর্থ-সম্পদ ও জনবল চিরশত্রু ফরাসিদের বিরুদ্ধে ব্যবহৃত হয় যা বাণিজ্য ও সাম্রাজ্য বিস্তারে ইংরেজদের সহায়ক হয়েছিল।

ইংরেজদের দিউয়ানী লাভ

১৭৬৫ খ্রিস্টাব্দে রবার্ট ক্লাইভ সম্রাট দ্বিতীয় শাহ আলমের সাথে এলাহাবাদ চুক্তি স্বাক্ষর করলে ইস্ট ইন্ডিয়া কোম্পানি বাংলা, বিহার ও উড়িষ্যার দিউয়ানী লাভ করে দ্বৈত শাসন প্রবর্তন করে। মধ্যবর্তী রাজ্য হিসেবে কোম্পানি ও মারাঠাদের মধ্যে অযোধ্যা রাজ্যকে প্রতিষ্ঠা করে ক্লাইভ ইংরেজ বিরোধী শক্তিগুলোর বিরুদ্ধেও এক শক্তিশালী প্রতিরোধ ব্যবস্থা গড়ে তোলেন। উপরন্তু ভাতা প্রদান করে সম্রাট ও নবাবকে নিয়ন্ত্রণে আনার ফলে রাজনৈতিক ও অর্থনৈতিক দিক হতে একক-ক্ষমতার অধিকারী হয়ে বসে। লর্ড ক্লাইভ উপমহাদেশে ইংরেজ সাম্রাজ্যের প্রতিষ্ঠাতার মর্যাদা পেলেও বাংলায় জালিয়াতি এবং উৎকোচ গ্রহণের অপরাধে স্বদেশবাসী তাঁর

বিরুদ্ধে পার্লামেন্টে বহু অভিযোগ উত্থাপন করেন। অবশেষে পার্লামেন্টে নির্দোষ প্রমাণিত হলেও ইংল্যান্ডবাসীর ধিক্কারে অতিষ্ঠ হয়ে ১৭৭৪ খ্রিস্টাব্দে স্বগৃহে ক্লাইভ আত্মত্যাগ করেন।

কৃতিত্ব

কূটবুদ্ধি ও ষড়যন্ত্রে ক্লাইভ
সফল হলেও শাসনকার্যে
ছিলেন অদূরদর্শী

রবার্ট ক্লাইভের চারিত্রিক দোষ থাকা সত্ত্বেও উপমহাদেশে ইংরেজ শক্তির গোড়া পত্তনে তাঁর অবদান অস্বীকার করা যায় না। কোম্পানির অধীনে সামান্য কেরানী হিসেবে ক্লাইভ এদেশে তাঁর কর্ম জীবন শুরু করলেও নিজ মেধা ও প্রতিভাবলে লর্ড উপাধীতে ভূষিত হন এবং বাংলার গভর্নরের পদটি লাভ করেন। তিনি অসীম সাহসিকতার সঙ্গে দাক্ষিণাত্যে ইংরেজদের সংকটময় মুহূর্তে আর্কট অভিযান করে তাঁদের রক্ষা করেন। তাঁর কূটনৈতিক বুদ্ধির ফলে পলাশীতে বাংলার স্বাধীনতার সূর্য ডুবে যায়। ফলে, এদেশে বনিকের মানদণ্ড রাজদণ্ডে পরিণত হয়। দ্বিতীয়বার গভর্নর হিসেবে তিনি সামরিক ও বে-সামরিক ক্ষেত্রে সংস্কার সাধন করে কোম্পানির আভ্যন্তরীণ অব্যবস্থা ও দুর্নীতি দূর করেন। কিন্তু শাসনকাজে তাঁর দূরদর্শিতা না থাকার ফলে তাঁরই প্রবর্তিত দ্বৈত শাসন এদেশের জন্য চরম দুর্ভোগ ও মৃত্যু ডেকে আনে। নবাব ও সম্রাটের সঙ্গে বন্ধুত্বমূলক মৈত্রী স্থাপন তাঁর কূটনৈতিক জ্ঞানের অন্যতম পরিচায়ক।

চরিত্র

অসৎ ও নীতিবোধহীন
চরিত্র

রবার্ট ক্লাইভ একজন সাহসী, স্থিরবুদ্ধি, দৃঢ় ও কর্মকুশল সম্পন্ন চরিত্রের অধিকারী ছিলেন, কিন্তু তা সত্ত্বেও তিনি অত্যন্ত অর্থলোলুপ ছিলেন এবং নিজ ও স্বদেশের স্বার্থসিদ্ধির ক্ষেত্রে তাঁর কোন সততাবোধ, বিচারবোধ ও নীতিবোধ ছিল না। যেমন ৪ নবাবের নিকট থেকে উৎকোচ গ্রহণ, উমিটাদের সাথে জাল-সন্ধি স্বাক্ষর, দস্তক ব্যবহারে বাংলার সম্পদ অপহরণ এবং জনসাধারণের উপর অত্যাচার-উৎপীড়ন প্রভৃতি কাজগুলো তাঁর চরিত্রে কলঙ্ক ঝাঁকে দিয়েছে। এ প্রসঙ্গে পার্সিভাল স্পিয়ার বলেন, “অরণ্যের পশু-পক্ষীর চোরাই শিকারীকে অরণ্যের প্রাণী সম্পদের রক্ষক করা হয়।” জনস্টন বলেন, “উপটৌকন গ্রহণের ব্যাপারে আমাদের সামনে স্বয়ং ক্লাইভের সম্মানিত দৃষ্টান্ত আছে।” এ সকল দোষ-ত্রুটি থাকা সত্ত্বেও এ কথা স্বীকার করতে হয় রবার্ট ক্লাইভই উপমহাদেশে ইংরেজ সাম্রাজ্যের গোড়া পত্তন করেছিলেন। তাই উপমহাদেশের ইতিহাসে রবার্ট ক্লাইভের নাম চিরস্মরণীয় হয়ে আছে।

সার-সংক্ষেপ

উপমহাদেশের ইতিহাসে ব্রিটিশ সাম্রাজ্যের স্থপতি ও প্রতিষ্ঠাতা হিসাবে লর্ড ক্লাইভের নাম অবিস্মরণীয়। কেননা প্রথম পর্যায়ে তিনি দাক্ষিণাত্যে কোম্পানিকে রক্ষা করেন; দ্বিতীয় পর্যায়ে তিনি বাংলা জয় করেন। তৃতীয় পর্যায়ে তিনি নবাব ও সম্রাটকে নিয়ন্ত্রণ করে সার্বভৌম ক্ষমতার অধিকারী হন এবং ইংরেজ শাসনের প্রতিষ্ঠাতা হিসেবে স্বীকৃতি লাভ করেন। ক্লাইভের কৃতিত্বের মূলে তাঁর তেজস্বীতা, সাহসিকতা, কূটবুদ্ধিতা, কর্মকুশলতা বিশেষভাবে কাজ করেছিল। কিন্তু তা সত্ত্বেও তিনি সম্মান পাননি তাঁর নিজ দেশে। কারণ তিনি ছিলেন অতিশয় অর্থলোলুপ, নীতিবোধ বিবর্জিত এক মানুষ। শাসন কাজেও তাঁর দূরদর্শিতা দেখা যায় না।

মীরজাফরের সিংহাসন
চ্যুতি

বিদ্রোহ দমন করা হলেও বকেয়া বেতনের দাবিতে সংঘটিত পূর্ণিয়ার বিদ্রোহ দমন সম্ভব হয়নি। মীরজাফর নবাবী পেলেও প্রকৃত ক্ষমতা প্রয়োগ কিংবা ভোগ করার ভাগ্য তার জোটেনি। এ কারণে মীরজাফর উদ্ধত ইংরেজদের বাংলা থেকে বিতাড়িত করতে খানিকটা প্রয়াস নেন। কিন্তু তার অযোগ্যতা, ওলন্দাজদের সঙ্গে পত্রালাপ এবং প্রতিশ্রুত অতিরিক্ত অর্থ না দেয়ার অজুহাতে ইস্ট ইন্ডিয়া কোম্পানীর অস্থায়ী গভর্নর ভ্যানসিটটি প্রস্তাবক্রমে মীরজাফরকে সিংহাসনচ্যুত করা হয় (১৭৬০ খ্রি:)।

মীর কাশিমের ক্ষমতা লাভ

দূরদর্শী ও স্বাধীনচেতা
নবাব

১৭৬০ খ্রিস্টাব্দে ইংরেজরা মীরজাফরের জামাতা মীরকাশিমকে বাংলার মসনদে অধিষ্ঠিত করেন। অবশ্য তিনিও কোম্পানিকে অনেক সুবিধাদানের শর্ত সাপেক্ষে ক্ষমতা লাভ করেন। মীরকাশিম মীরজাফরের মতো অপদার্থ, অযোগ্য ও হীন চরিত্রের ছিলেন না। তিনি একজন সুদক্ষ শাসক, দূরদর্শী রাজনীতিবিদ এবং স্বাধীনচেতা মানুষ ছিলেন। জনসাধারণের কল্যাণের প্রতি তিনি সচেতন ছিলেন। তাই তিনি ইংরেজদের সাথে সম্মানজনক উপায়ে বাংলার স্বার্থ রক্ষা করে আর্থিক ও সামরিক দুর্বলতা কাটিয়ে উঠতে চেয়েছিলেন, যা হীন চরিত্রের অধিকারী মীরজাফরের পক্ষে সম্ভব হয়ে উঠেনি। কিন্তু শেষ পর্যন্ত নানাবিধ কারণে নবাব মীরকাশিমও বাংলার স্বাধীনতা রক্ষা করতে ব্যর্থ হন। তাই বঙ্গারের যুদ্ধে ইংরেজ আধিপত্য উপমহাদেশের গভীরে প্রতিষ্ঠিত হয়। ফলে বাংলার স্বাধীন হওয়ার শেষ আশাটুকু নিভে যায়।

বঙ্গার যুদ্ধের কারণ

মীরকাশিম বাংলার মসনদে আরোহণ করেই বুঝতে পেরেছিলেন যে ইংরেজদের সাথে ভবিষ্যতে তাঁর সংঘর্ষ সুনিশ্চিত। কারণ মীরকাশিম ছিলেন- মীরজাফরের চেয়ে সম্পূর্ণ ভিন্ন প্রকৃতির। ইংরেজদের সাথে ঝগড়া করার ইচ্ছা তাঁর না থাকলেও ইংরেজদের হাতে ক্রীড়নক হয়ে থাকার মতো হীন মনোবৃত্তি তাঁর ছিল না। তাই তিনি প্রকৃত নবাব হিসেবে দেশ শাসন করতে চেয়েছিলেন। ফলে তিনি দেশ, জাতি ও স্বীয় স্বার্থে কয়েকটি পদক্ষেপ গ্রহণ করেন যা বঙ্গারের যুদ্ধের কারণে পরিণত হয়।

১. সতর্কতামূলক পদক্ষেপ গ্রহণ

রাজধানী স্থানান্তর

ইংরেজ প্রভাব থেকে দূরে
থাকার জন্য রাজধানী
স্থানান্তর

দূরদৃষ্টি সম্পন্ন ছিলেন বলে সিংহাসনে বসেই মীরকাশিম উপলব্ধি করতে পেরেছিলেন যে এদেশে ইংরেজদের রাজনৈতিক-হস্তক্ষেপ বন্ধ করতে না পারলে ভবিষ্যতে তারাই যে এদেশের ভাগ্য বিধাতা হয়ে দাঁড়াবে। রাজধানীতে ইংরেজ রেসিডেন্টের শাসনকার্যে অবৈধ হস্তক্ষেপ স্বাধীনচেতা মীরকাশিমের নিকট অসহনীয় ছিল। তাই প্রশাসনকে ইংরেজ প্রভাবমুক্ত রাখার জন্য তিনি মুর্শিদাবাদ থেকে মুঙ্গেরে রাজধানী স্থানান্তরিত করেন এবং চারপাশে পরিখা-খনন করে ও দুর্গ নির্মাণ করে রাজধানীর নিরাপত্তা নিশ্চিত করেন।

সৈন্য বাহিনীকে আধুনিক
ভাবে গড়ে তোলা

মীরকাশিমের মনে হয়েছিল যে ইংরেজরা পুনরায় মীরজাফরকে বাংলার সিংহাসনে বসাতে পারে। সুতরাং তাঁকে প্রস্তুতি গ্রহণ করতে হয়েছিল। তাই ইংরেজদের সম্ভাব্য আক্রমণের মোকাবিলা করার জন্য মীরকাশিম সামরিক ও মার্কার নামে দু'জন ইউরোপীয় সৈনিকের সাহায্যে নিজ বাহিনীকে ইউরোপীয় সামরিক পদ্ধতিতে শিক্ষা দানের ব্যবস্থা করেন।

অস্ত্রশস্ত্রের ব্যাপারে তিনি কোম্পানির নিয়ন্ত্রণ হতে স্বাধীন থাকার জন্য মুঙ্গেরে কামান, বন্দুক ও গোলাবারুদ নির্মাণের ব্যবস্থাও করেন।

মীর কাশিমের আভ্যন্তরীণ
সংস্কার

বিহারের শাসনকর্তা রামনারায়ণের ইংরেজ প্রীতি ও দুর্নীতি লক্ষ করে মীরকাশিম তাঁকে পদচ্যুত ও তাঁর সম্পত্তি বাজেয়াপ্ত করলে মীরকাশিমের এ সমস্ত কার্যাবলী ইংরেজদের মনে অসন্তোষ ও সন্দেহের সৃষ্টি করে। ফলে তা যুদ্ধের অন্যতম কারণ হয়ে দেখা দেয়।

২. বাদশাহী ফরমানের অবমাননা

১৭১৭ খ্রিস্টাব্দে মুগল সম্রাট ফররুখ শিয়ার কর্তৃক প্রদত্ত ফরমান বলে কোম্পানি বিনাশুল্ক বাণিজ্য করার অধিকার লাভ করে। কিন্তু এ ফরমান অমান্য করে কোম্পানির অনেক কর্মকর্তা ও কর্মচারী 'দস্তক' নামক ছাড়পত্রে মাল আমদানি বা রপ্তানি বাণিজ্য সংক্রান্ত কথাটি লিখিয়ে বিনা শুল্ক কোম্পানির মাল একস্থান থেকে অন্যস্থানে আনা নেয়া করতো। এ সমস্ত 'দস্তক' স্বাক্ষরের ভার নবাব কোম্পানির উচ্চপদস্থ কর্মচারির উপর দেন। ফলে দেশীয় বণিকগণ ব্যবসা ক্ষেত্রে অত্যন্ত ক্ষতির সম্মুখীন হয় এবং নবাব নিজেও প্রাপ্য বাণিজ্য শুল্ক হতে বঞ্চিত হতে থাকেন।

দস্তকের অপব্যবহার

৩. অবাধ বাণিজ্যের প্রচলন

অবৈধভাবে এ আন্তঃবাণিজ্য চলতে থাকায় দেশীয় বণিকরা ইংরেজ বণিকদের সাথে প্রতিযোগিতায় টিকে থাকতে অসমর্থ হয়। মীরকাশিম এ বিষয়ে গভর্নরের কাছে প্রতিবাদ জানালেন। কিন্তু নবাব প্রতিকারে না পেয়ে ইংরেজ ও দেশীয় ব্যবসায়ী নির্বিশেষে সকল ব্যবসায়ীদের উপর থেকে বাণিজ্য শুল্ক উঠিয়ে দেন। এতে নবাবের রাজস্ব আয় কমে গেলেও দেশীয় বণিকদের সাথে বিদেশী বণিকদের অন্যান্য প্রতিযোগিতার পথ বন্ধ হয়ে যায়। এ নতুন ব্যবস্থার ফলে ইংরেজদের স্বার্থে আঘাত লাগে।

ইংরেজদের একচেটিয়া
বাণিজ্যের বিরুদ্ধে ব্যবস্থা

বঙ্গারের যুদ্ধ

প্রথমেই কলকাতা ইংরেজ কুঠিরের অধ্যক্ষ এলিসের সঙ্গে নবাবের সংঘর্ষ শুরু হয়। অধ্যক্ষ এলিস হঠাৎ পাটনা আক্রমণ করে তা দখল করে নেন। ফলে বাধ্য হয়ে নবাবকে এলিসের বিরুদ্ধে অস্ত্রধারণ করতে হয়। মীরকাশিম পাটনা হতে এলিসকে বিতাড়িত করে পাটনা পুনরুদ্ধার করলে কোলকাতা-কাউন্সিল নবাবের বিরুদ্ধে ১৭৬৩ খ্রিস্টাব্দে যুদ্ধ ঘোষণা করে। মেজর এডামসের নেতৃত্বে ইংরেজরা নবাবের বিরুদ্ধে এক বিরাট বাহিনী প্রেরণ করে। কিন্তু নবাব তাঁর সৈন্য সংখ্যা বেশি থাকা সত্ত্বেও গিরিয়া, কাটোয়া ও উদয়নালার যুদ্ধে (১৭৬৩ খ্রি:) শোচনীয়ভাবে পরাজিত হয়ে অযোধ্যায় আশ্রয় গ্রহণ করেন।

ইংরেজদের সামরিক ও
কূটনৈতিক বিজয়

১৭৬৩ খ্রিস্টাব্দে যুদ্ধ চলাকালীন সময়ে ইংরেজগণ আবার মীরজাফরকে পুতুল নবাব হিসেবে বাংলার সিংহাসনে বসালেন। নতুন নবাব মীরজাফর মীরকাশিম কর্তৃক জারীকৃত সকল ঘোষণা ও বিধি প্রত্যাহার করে নিলেন। এতে ইংরেজরা আবার প্রমাণ করলো যে তারাই বাংলার সমস্ত রাজনৈতিক ক্ষমতার উৎস এবং নবাব বানানোর ও নামানোর মালিক।

মীরজাফর পুনরায় পুতুল
নবাব

মীরকাশিম পরাজিত হওয়া সত্ত্বেও হাল ছাড়েননি। অতঃপর মীরকাশিম অযোধ্যার নবাব সুজাউদ্দৌলা ও মুগল সম্রাট শাহ আলমের সহায়তায় ১৭৬৪ খ্রিস্টাব্দে ইংরেজদের বিরুদ্ধে এক চরম শক্তি পরীক্ষার জন্য প্রস্তুতি গ্রহণ করেন। কিন্তু বিহারের বঙ্গার নামক স্থানে মিলিত বাহিনী মেজর মনরোর হাতে শোচনীয়ভাবে পরাজিত হয়।

মীরকাশিমের পরাজয়

ফলাফল বা গুরুত্ব

বঙ্গারের যুদ্ধ বাংলা তথা উপমহাদেশের ইতিহাসে একটি সুদূরপ্রসারী ফল এনে দিয়েছিল। এ যুদ্ধ পলাশীর যুদ্ধ অপেক্ষা অনেক বেশি গুরুত্ব বহন করে।

১. এ যুদ্ধে পরাজয়ের ফলে দিল্লীর মুঘল সম্রাট শাহ আলম ইংরেজদের পক্ষে যোগদান করেন।
২. অযোধ্যার নবাব সুজাউদ্দৌলা রোহিলাখণ্ডে পালিয়ে গেলেন।
৩. মীরকাশিম আত্মপন করলেন। অবশেষে ১৭৭৭ খ্রিস্টাব্দে দিল্লীর সন্নিকটে তিনি মৃত্যু বরণ করেন।
৪. এ যুদ্ধের ফলে মীরকাশিমের ইংরেজ বিতারণ ও স্বাধীনতা রক্ষার শেষ আশা-ভরসাটুকুও ধূলিসাৎ হয় এবং উপমহাদেশে ইংরেজ প্রভাব ও মর্যাদা বহুগুণে বেড়ে যায়।
৫. এ যুদ্ধের ফলে উপমহাদেশের অন্যান্য অঞ্চলেও বিনা বাধায় ইংরেজ আধিপত্য বিস্তারের পথ উন্মোচিত হয়।
৬. কোম্পানি অযোধ্যার নবাবের নিকট থেকে কারা ও এলাহাবাদ অঞ্চল দু'টি কেড়ে নেয়।
৭. এ যুদ্ধে কেবলমাত্র মীরকাশিম পরাজিত হননি; স্বয়ং সম্রাট শাহ আলম ও সুজাউদ্দৌলাও পরাজিত হয়েছিলেন। ফলে দিল্লী থেকে বাংলা পর্যন্ত সমগ্র উত্তর ভারত ইংরেজদের অধীনে চলে যায়।
৮. এ যুদ্ধের ফলে ক্লাইভ দিল্লীতে আনুষ্ঠানিকভাবে সম্রাটের কাছ থেকে বাংলা বিহার ও উড়িষ্যার দিওয়ানী (রাজস্ব আদায়ের কর্তৃত্ব) লাভ করেন। ফলে বাংলায় ইংরেজ অধিকার আইনত স্বীকৃত হয় ও কোম্পানি অসীম ক্ষমতার অধিকারী হয়।
৯. ঐতিহাসিক জেমস স্টিফেন্স বলেন, “বৃটিশ শক্তির উৎপত্তি হিসেবে উপমহাদেশে পলাশির যুদ্ধ অপেক্ষা বঙ্গারের যুদ্ধ অধিকতর গুরুত্বপূর্ণ।” কারণ- মীরকাশিমের পরাজয়ের সঙ্গে সঙ্গে বাংলার নবাবী আমল শেষ হয়ে যায় এবং পরবর্তী ঘটনাবলী ছিল ইংরেজ সাম্রাজ্যের বিস্তার ও সংগঠনের যুগ।

সার-সংক্ষেপ

পলাশীর প্রান্তরে ইংরেজদের সাহায্য করার পুরস্কার স্বরূপ বিশ্বাসঘাতক মীরজাফর বাংলার সিংহাসন লাভ করেও প্রকৃত নবাব হতে পারেননি। ইংরেজদের ক্রমাগত চাহিদা মেটাতে অক্ষমতা প্রকাশ করলে ইংরেজ গভর্নর ড্যানফোর্ড ১৭৬০ খ্রিস্টাব্দে মীরজাফরকে সিংহাসনচ্যুত করে তাঁর জামাতা মীরকাশিমকে শর্ত সাপেক্ষে বাংলার সিংহাসনে বসান। স্বাধীনচেতা মীরকাশিম ইংরেজদের বাংলার স্বার্থ বিরোধী কার্যকলাপের বিরুদ্ধে প্রতিবাদ করলে ইংরেজরা তাঁকে সন্দেহের চোখে দেখতে শুরু করে এবং ভেতরে ভেতরে নিজেরাও প্রস্তুত হতে থাকে। এ সময় গভর্নর এলিস হঠাৎ করে পাটনা দখল করলে মীরকাশিম তা পুনরুদ্ধার করেন। ১৭৬৩ খ্রিস্টাব্দে কলকাতা কাউন্সিল যুদ্ধ ঘোষণা করলে মীরকাশিম গিরিয়া, উদয়নালা ও কাটোয়ার যুদ্ধে ইংরেজ সেনাপতি এডামসের হাতে পরাজিত হন। পরবর্তী সময়ে অযোধ্যার নবাব সুজাউদ্দৌলা ও মুঘল সম্রাট দ্বিতীয় শাহ আলমের সাহায্য লাভ করেও বঙ্গারের যুদ্ধে (১৭৬৪ খ্রি:) পুনরায় তিনি ইংরেজ সেনাপতি মেজর মনরোর হাতে শোচনীয়ভাবে পরাজিত হন। এ যুদ্ধে পরাজয়ের ফলে বাংলার নবাবের অবশিষ্ট মর্যাদাটুকুও অবলুপ্ত হয়ে যায়। ১৭৬৫ খ্রিস্টাব্দে মীরজাফরের মৃত্যু হলে ইংরেজগণ তাঁর পুত্র নজমুউদ্দৌলাকে নাম মাত্র নবাবী দিলেন বটে, তবে প্রকৃত ক্ষমতা থাকলো কোম্পানির হাতে। পরবর্তী সময়ে সম্রাট ২৬ লক্ষ টাকা রাজস্বের বিনিময়ে কোম্পানিকে বাংলার বিহার উড়িষ্যার দিওয়ানীর দায়িত্ব দেন। এভাবে বঙ্গারের যুদ্ধের মধ্য দিয়ে চূড়ান্তভাবে বাংলার স্বাধীনতা ইংরেজরা গ্রাস করে।

সুবাদার ও দিউয়ানের
দায়িত্ব

এখন প্রশ্ন হতে পারে যে কি ভাবে ইংরেজগণ এই সরাসরি হস্তক্ষেপের ক্ষমতা লাভ করে? এ প্রসঙ্গে বলা দরকার যে, মুগল শাসনতন্ত্রে প্রদেশ শাসনের জন্য দু'টি সমপর্যায়ের পদের বিধান ছিল। একটি সুবাদারী, আরেকটি দিউয়ানী। সুবাদার ও দিউয়ান উভয় ব্যক্তিই সরাসরি দিল্লীর সম্রাটের নিকট ব্যক্তিগত ভাবে জবাবদিহি করতে বাধ্য ছিলেন। তাঁরা একে অপরকে প্রশাসনিক ক্ষেত্রে সহযোগিতা করতেন, কিন্তু একে অন্যকে তাঁর অধীন করতে পারতেন না। সুবাদারের দায়িত্ব ছিল বিচার, প্রতিরক্ষা ও সাধারণ প্রশাসন পরিচালনা, আর দিউয়ানের দায়িত্ব ছিল মূলত রাজস্ব (খাজনা) শাসন। তাই দিউয়ানী লাভের অর্থ রাজস্ব আদায়ের কর্তৃত্ব লাভ করা। কোন প্রাদেশিক শাসনকর্তা যেন স্বেচ্ছাচারী ও স্বাধীনতাকামী হয়ে না পড়ে সে উদ্দেশ্যেই এ ক্ষমতা বিভাজনের ব্যবস্থা ছিল। প্রশাসনিক দক্ষতা অর্জনও ছিল এই ব্যবস্থার আর এক লক্ষ্য।

মুর্শিদকুলী খা ও দিউয়ানী

মুর্শিদকুলী খানের (১৭১৭ খ্রি:) সুবাদারী লাভ পর্যন্ত সুবাদারী ও দিউয়ানের পদ পৃথক পৃথক ব্যক্তির উপর ন্যস্ত ছিল। মুর্শিদকুলী খানই প্রথম যিনি মুগল শাসনতান্ত্রিক প্রথা ভঙ্গ করে দিউয়ানের পদটিও নিজে দখল করে নেন। কিন্তু পরবর্তী সময়ে কেন্দ্রের দুর্বলতার সুযোগে মুর্শিদকুলী খানের পরবর্তী সব সুবাদারগণই সুবাদারী ও দিউয়ানীর পদ একত্রীভূত রাখেন। ১৭০৭ খ্রিস্টাব্দে সম্রাট আওরঙ্গজেবের মৃত্যুর পর সুবে বাংলা প্রায় স্বাধীন ভাবে শাসিত হতে থাকে।

পলাশী যুদ্ধোত্তর দিউয়ানী

মারাঠা উৎপাতের কারণে আলীবর্দী খান কেন্দ্রকে রাজস্ব পাঠানো প্রায় বন্ধ করে দেন। সিরাজউদ্দৌলা ও মীরজাফরের আমলে কেন্দ্রকে রাজস্ব দেয়া সম্পূর্ণ বন্ধ হয়ে যায়। পলাশীর যুদ্ধের পর হতে কোম্পানি ছিল দেশের হর্তাকর্তা। কেন্দ্রীয় রাজনীতি তথা সমগ্র উপমহাদেশের রাজনীতি এমনভাবে পরিবর্তিত হচ্ছিল যে, সুবে বাংলা আবার আগের মতো বেশি করে রাজস্ব কেন্দ্রে (দিল্লীতে) পাঠাবে— এমন আশা সম্রাট শাহ আলম ছেড়েই দিয়েছিলেন। এ পরিস্থিতিতে সম্রাট কয়েকবার কোম্পানিকে বাৎসরিক কিছু উপটোকনের বদলে বাংলা, বিহার, উড়িষ্যার দিউয়ানী গ্রহণের জন্য অনুরোধ করলে কোম্পানি তা প্রত্যাখ্যান করে।

লর্ড ক্লাইভ ও কোম্পানীর
দিউয়ানী লাভ

এদিকে বঙ্গার যুদ্ধের পর কোম্পানির কর্মচারীদের মধ্যে দুর্নীতি ও বিশৃঙ্খলা চরমে উঠলে এবং বাংলার রাজনৈতিক পরিবেশ খারাপ হলে, ইংরেজ সরকার ভীত হয়ে পড়লেন। ফলে ইংল্যান্ডের কর্তৃপক্ষ কোম্পানির দুর্নীতি দমন ও স্বার্থ বৃদ্ধির জন্য পুনরায় ক্লাইভকে লর্ড উপাধি দান করে বাংলায় দ্বিতীয়বার প্রেরণ করেন (১৭৬৫-১৭৬৭ খ্রি:)। এদেশে এসেই তিনি মীরকাশিমের মিত্রশক্তি অযোধ্যার নবাব সুজাউদ্দৌলা ও দিল্লীর সম্রাট দ্বিতীয় শাহ আলমের প্রতি নজর দেন। বঙ্গার যুদ্ধের ক্ষতিপূরণ বাবদ ৫০ লক্ষ টাকা এবং কারা ও এলাহাবাদ জেলা দু'টি পেয়ে অযোধ্যার নবাবের সাথে মিত্রতা স্থাপন করেন। তারপর তিনি দিল্লীর দুর্বল সম্রাট দ্বিতীয় শাহ আলমের সাথে সন্ধি স্থাপন করেন। ক্লাইভ কারা ও এলাহাবাদ জেলা দু'টি ও বাৎসরিক ২৬ লক্ষ টাকা কর প্রদানের বিনিময়ে সম্রাটের নিকট হতে বাংলা, বিহার ও উড়িষ্যার দিউয়ানী লাভ করলেন (১৭৬৫ খ্রিস্টাব্দে ১২ আগস্ট ইস্ট ইন্ডিয়া কোম্পানি দিউয়ানী সনদ লাভ করে)।

ফলাফল ও গুরুত্ব

কোম্পানির রাজনৈতিক
বিজয়

কোম্পানির দিক থেকে বাংলার দিউয়ানী লাভ ছিল এক বিশেষ গুরুত্বপূর্ণ পদক্ষেপ।

প্রথমত: দিউয়ানী লাভ ছিল কোম্পানির জন্য একটি বিরূপ রাজনৈতিক বিজয়। এর ফলে সম্রাট ও নবাব একেবারে ক্ষমতাহীন হয়ে ইংরেজদের হাতের পুতুল বনে যায়। নবাবের না

ছিল রাজস্ব আদায়ের অধিকার, না ছিল সেনাদল রাখার মতো অর্থবল। নবাবকে নামমাত্র সিংহাসনে বসিয়ে রেখে কোম্পানিই সকল ক্ষমতা অধিকার করে নেয়। ফলে বাংলায় আইনত ও কার্যত ব্রিটিশ শাসন দৃঢ়ভাবে প্রতিষ্ঠিত হয়।

কোম্পানির অর্থনৈতিক বিজয়

দ্বিতীয়ত: কোম্পানির দিউয়ানী লাভ ছিল কোম্পানির জন্য আরও একটি বিরাট অর্থনৈতিক বিজয়। এর ফলে কোম্পানি নিজের দেউলিয়া অবস্থা হতে রক্ষা পায়। দিউয়ানী লাভের সুযোগ সুবিধা ঙ্গড়ং ডভ উরৎবপঃডংৎ-কে অবহিত করতে গিয়ে লর্ড ক্লাইভ বলেন যে বাংলা, বিহার, উড়িষ্যা থেকে যে রাজস্ব পাওয়া যাবে তা এত বেশি যে, সম্রাট ও নবাবের নির্ধারিত ভাতা ও অন্যান্য সামরিক ও বেসামরিক খাতে সমস্ত ব্যয় বাদ দিলেও কোম্পানির হাতে নেট আয় থাকবে ১২ কোটি টাকারও উপর (১৭৬৫-৬৬ খ্রিস্টাব্দের রাজস্ব হিসেব থেকে)।

ইউরোপ থেকে ব্যবসার পুঁজি আসা বন্ধ হয়ে যায়

তৃতীয়ত: লর্ড ক্লাইভ Court of Directors-কে আরও জানান যে, ঐ উদ্বৃত্ত রাজস্ব কোম্পানির গোটা বাণিজ্য বিনিয়োগের জন্য যথেষ্ট। ফলে দিউয়ানী লাভের আগে এ দেশে বাণিজ্য করার জন্য ইউরোপ হতে কোম্পানি যে বিপুল পুঁজি নিয়ে আসতো তা দিউয়ানী লাভের পর বন্ধ হয়ে যায় এবং ব্যবসার সমস্ত পুঁজি প্রদেশের রাজস্ব হতেই সংগ্রহ করা হয়।

এদেশবাসীর উপর অর্থনৈতিক শোষণ

চতুর্থত: দিউয়ানী লাভের ফলে কোম্পানির কর্মচারীরা বাংলায় শুদ্ধহীন অবাধ বাণিজ্যের সুযোগ পায়। ফলে কোম্পানির কর্মচারীদের অর্থের লোভ দিন দিন বাড়তে থাকে। অসুদুপায়ে রাজস্ব আদায় ও আশ্রয় করলেও কোম্পানির কর্তারা কোন পদক্ষেপ নিতেন না। এভাবে অর্থনৈতিক শোষণের ফলে এদেশের মানুষের মেরুদণ্ড ভেঙ্গে যায়।

বাংলার সম্পদ ইংল্যান্ডে পাচার হয়ে যায়

পঞ্চমত: দিউয়ানী লাভের পর বাংলা থেকে ব্যাপকভাবে অর্থ ও সম্পদ ইংল্যান্ডে পাচার হতে থাকে। তাই ১৭৬৫ খ্রিস্টাব্দে বাংলার দিউয়ানী প্রকৃত অর্থে ইংল্যান্ডের শিল্প বিপ্লবের ক্ষেত্র রচনা করে।

সার-সংক্ষেপ

বঙ্গারের যুদ্ধের পর বাংলা তথা উপমহাদেশে ইংরেজদের দিউয়ানী লাভ ইংরেজ প্রভুত্ব স্থাপনের ইতিহাসে একটি গুরুত্ব ও তাৎপর্যপূর্ণ ঘটনা। মীরকাশিমের নবাবী লাভের আগেই ক্লাইভ ইংলন্ডে ফিরে যান। কিন্তু ইংল্যান্ড কর্তৃপক্ষ এদেশে কোম্পানির দুর্নীতি দমনের ও বাণিজ্যিক স্বার্থ রক্ষার জন্য আবার তাঁকে লর্ড উপাধিতে ভূষিত করে দ্বিতীয় বার এদেশে প্রেরণ করে। ক্লাইভ বাংলায় এসে দেখেন যে বঙ্গারের যুদ্ধে ত্রি-পক্ষীয় শক্তিকে অপ্রত্যাশিতভাবে পরাজিত করার ফলে কোম্পানির একশ্রেণীর কর্মকর্তারা বাংলা ছাড়া অযোধ্যা ও দিল্লীতে আধিপত্য স্থাপনের কথা ভাবছে। ক্লাইভ অত্যন্ত বাস্তব বোধ সম্পন্ন বিচক্ষণ লোক ছিলেন। অবশেষে তিনি দিউয়ানী লাভের মাধ্যমে ব্রিটিশ শক্তিকে এদেশে প্রতিষ্ঠিত করেন। ইংরেজদের এই দিউয়ানী লাভ করাকে বাংলার অর্থনৈতিক ক্ষেত্রে এবং এর সূত্র ধরে রাজনৈতিক ক্ষেত্রে 'হস্তক্ষেপের সনদ' বলা যেতে পারে। ইংরেজরা উপমহাদেশ প্রায় দু'শো বছর শাসন করে। অনেক ঐতিহাসিক তাই, ইংরেজদের এই দিউয়ানী লাভ করাকে ইতিহাসের এক যুগান্তকারী ঘটনা বলে বর্ণনা করেছেন।

পাঠোত্তর মূল্যায়ন : ৫.৫



নৈর্ব্যক্তিক প্রশ্ন:

১. দিল্লীর সম্রাট দ্বিতীয় শাহ আলম ও অযোধ্যার নবাবের সাথে যে চুক্তির বলে বাংলা, বিহার ও উড়িষ্যার রাজস্ব আদায়ের ভার ইংরেজ কোম্পানি পায় তার নাম —
ক. এলাহাবাদ চুক্তি
খ. কলিকাতা চুক্তি
গ. আলীগড় চুক্তি
ঘ. দিল্লী চুক্তি
২. ইংরেজ কোম্পানি 'দিউয়ানী' লাভ করে —
ক. ১৭৬২ খ্রিস্টাব্দে
খ. ১৭৬৩ খ্রিস্টাব্দে
গ. ১৭৬৪ খ্রিস্টাব্দে
ঘ. ১৭৬৫ খ্রিস্টাব্দে
৩. লর্ড ক্লাইভ দিল্লীর সম্রাট দ্বিতীয় শাহ আলমকে বার্ষিক ভাতা মঞ্জুর করেন —
ক. বার্ষিক তেইশ লক্ষ টাকা
খ. বার্ষিক চব্বিশ লক্ষ টাকা
গ. বার্ষিক পঁচিশ লক্ষ টাকা
ঘ. বার্ষিক ছাব্বিশ লক্ষ টাকা
৪. যে নবাবের সময় থেকে দিল্লীতে রাজস্ব পাঠানো প্রায়ই বন্ধ হয়ে যায়; তার নাম—
ক. সিরাজউদ্দৌলা
খ. আলীবর্দী খান
গ. মীরজাফর
ঘ. মুর্শিদকুলী খান



সংক্ষিপ্ত-উত্তর প্রশ্ন:

১. মুগল আমলে সুবাদার ও দিউয়ানের দায়িত্ব বর্ণনা করুন।
২. ইংরেজদের দিউয়ানী লাভের ফলাফল কি হয়েছিল?



কোম্পানীর দ্বৈতশাসন ও ছিয়াত্তরের মন্বন্তর

উদ্দেশ্য

এ পাঠ পড়ে আপনি—

- দ্বৈত শাসন বলতে কি বুঝায় তা বর্ণনা করতে পারবেন।
- দ্বৈত শাসনের ফলাফল সম্পর্কে বিবরণ দিতে পারবেন।
- ছিয়াত্তরের মন্বন্তর কি তা বর্ণনা করতে পারবেন।



পূর্ববর্তী পাঠে আপনারা জেনেছেন ১৭৬৫ খ্রিস্টাব্দে ইংরেজরা এলাহাবাদ চুক্তি বলে দিউয়ানী লাভ করে। এ সময় লর্ড ক্লাইভ বাংলার গভর্নর হয়ে আসেন এবং এদেশের পরিস্থিতি পর্যবেক্ষণ করে এক নতুন দ্বৈত শাসন নীতি প্রবর্তন করেন। দিউয়ানী এবং নিয়ামত-এই দ্বিবিধ শাসন কার্যের দায়-দায়িত্বের ভাগাভাগিকে দ্বৈত শাসন বলে। এই ব্যবস্থা অনুযায়ী রাজস্ব আদায় ও দেশ রক্ষার ভার থাকে কোম্পানির হাতে; আর নিয়ামত বা বিচার ও প্রশাসন বিভাগের দায়িত্ব থাকে নবাবের উপর। কোম্পানির সরাসরি দিউয়ানীর দায়িত্ব গ্রহণে বেশ কিছু

দ্বৈত শাসন ব্যবস্থা

**কোম্পানী আর্থিক সুবিধা
নিবে: দিওয়ানী শাসনের
দায়িত্ব নিবে না**

**প্রকৃত ক্ষমতা চলে যায়
কোম্পানির হাতে**

**কোম্পানির প্রতিনিধি
হিসেবে দিওয়ান নিযুক্তি**

অসুবিধা ছিল। সরাসরি দিওয়ানী শাসনের জন্য কোম্পানির যে অর্থ ও লোক বল প্রয়োজন তা তাদের ছিল না। উপরন্তু এদেশীয় ভাষা, আইন কানুন সম্পর্কে কোম্পানির কর্মচারীদের জ্ঞান না থাকায় রাজস্ব শাসন সরাসরি গ্রহণ করা ছিল কোম্পানির জন্য বিপদজনক। তা ছাড়া কোম্পানি সরাসরি রাজস্ব গ্রহণ করলে বাংলায় বাণিজ্যের অন্যান্য ইউরোপীয় বণিকদের সাথে সংঘর্ষ ছিল অনিবার্য। কেননা, বাণিজ্যিক শুল্ক আদায় ছিল দিওয়ানীর অন্তর্গত। অন্যান্য ইউরোপীয় কোম্পানিগুলো দেশীয় সরকারকে শুল্ক দিতে রাজী থাকলেও ইংরেজদের শুল্ক দিতে রাজী ছিল না। অতএব ক্লাইভ বুদ্ধি করে দিওয়ানীর সমস্ত শাসনভার দেন নবাবের উপর এবং কোম্পানির কাছে রাখেন শুধু কেন্দ্রীয়ভাবে তত্ত্বাবধানের ক্ষমতা। কোম্পানি ইচ্ছামত রাজস্ব সংগ্রহ করে সম্রাট ও নবাবের ভাতা এবং শাসনকার্যের জন্য নির্দিষ্ট পরিমাণ টাকা রেখে উদ্বৃত্ত অর্থ নিজেরা গ্রহণ করতো। এ ব্যবস্থার ফলে দায়দায়িত্ব ছাড়াই প্রকৃত ক্ষমতা থাকে কোম্পানির হাতে। তাই অন্যভাবে, অতি সহজেই বলা যেতে পারে যে, নবাব পেলেন ক্ষমতাহীন-দায়-দায়িত্ব আর কোম্পানি লাভ করলো দায়িত্বহীন ক্ষমতা।

এতকাল ধরে বাংলার নবাবগণ ছিলেন একাধারে নাযিম ও দিওয়ান। নাযিম হিসেবে তাঁরা শাসন, বিচার ও প্রতিরক্ষার কাজ চালাতেন। আর দিওয়ান হিসেবে তাঁরা রাজস্ব সংগ্রহ করে ব্যয় করতেন। কিন্তু দ্বৈত শাসন ব্যবস্থায় নবাবের ক্ষমতা কমিয়ে তাঁর উপর অনেক দায়িত্ব দেয়া হয়; অথচ অর্থ ও ক্ষমতা ছাড়া দায়িত্ব অর্থহীন। অধিকন্তু, রাজস্ব বিভাগের সঙ্গে ফৌজদারী ও দিওয়ানী বিচার ওতপ্রোতভাবে জড়িত। এতে প্রত্যক্ষভাবে না হলেও পরোক্ষভাবে প্রকৃত কর্তৃত্ব কোম্পানির হাতেই থেকে যায়। নবাব অনেক দায়িত্ব বহন করে শুধুমাত্র বৃত্তিভোগী হিসেবে রয়ে গেলেন।

নবাব নাবালক হওয়ার অজুহাতে ক্লাইভ তাঁর অভিভাবক হিসেবে রাজস্ব বিশারদ সৈয়দ মুহম্মদ রেজা খানকে নিযুক্ত করে নায়েব নাজিম উপাধি দান করেন এবং তাঁর উপর বাংলার রাজস্ব আদায়ের সম্পূর্ণ দায়িত্ব ছেড়ে দেন। অন্যদিকে বিহারের রাজস্ব আদায়ের দায়িত্ব দেয়া হয় রাজা সেতাব রায়কে। তাঁরা ছিলেন কোম্পানির প্রতিনিধি দিওয়ান। তাঁদের উপাধি দেয়া হয় নায়েব দিওয়ান। কোম্পানির স্বার্থ রক্ষার্থে তাঁরা রাজস্ব আদায় করতেন এবং কোম্পানির আদেশ মেনে চলতেন। অন্যদিকে কোম্পানির পক্ষ থেকে তাঁদের উপর নজর রাখার জন্য মুর্শিদাবাদ দরবারে একজন ইংরেজ প্রতিনিধি অবস্থান করতেন। ফলে দ্বৈত শাসন ব্যবস্থায় জটিলতার সৃষ্টি হয়। কারণ আদায়কৃত রাজস্ব থেকে শাসন কার্যের সকল ব্যয় মেটানোর পর উদ্বৃত্ত অর্থ রেজা খানকে কোম্পানির হাতে তুলে দিতে হতো; অথচ রাজস্ব বৃদ্ধির হার বাড়ানো বা কমানোর ক্ষমতা থেকে যেতো কোম্পানির হাতে। ফলে রেজা খানকে এমনি এক উদ্ভূত অবস্থা মোকাবেলা করতে হয় এবং জনসাধারণও এক অমানুষিক দুঃখ-দুর্দশার শিকারে পরিণত হয়। এরই ফলে ১১৭৬ বঙ্গাব্দে (১৭৭০ খ্রি:) বাংলায় এক ভয়াবহ দুর্ভিক্ষ দেখা দেয় যা ছিয়ান্তরের মন্বন্তর নামে পরিচিত।

ফলাফল

লর্ড ক্লাইভ প্রবর্তিত দ্বৈত-শাসন ব্যবস্থায় সুফলের পরিবর্তে কুফলই দেখা যায় বেশি। দ্বৈত শাসন ব্যবস্থার কুফল বাংলার শান্তি, স্থিতি ও সমৃদ্ধিকে ধ্বংস করে দেয় এবং বাংলার সামাজিক অর্থনৈতিক অবস্থায় এক চরম দুর্যোগ শুরু হয়।

**দেশের আইন শৃঙ্খলা
পরিস্থিতির অবনতি**

প্রথমত: এ ব্যবস্থায় নবাবের দেশ শাসনের দায়িত্ব ছিল বটে; কিন্তু তাঁর কোন ক্ষমতা ছিল না। অন্যদিকে, কোম্পানির ক্ষমতা ছিল বটে; কিন্তু কোন দায়িত্ব ছিল না। কর্তৃত্বের এরূপ বিভাগ

বাস্তব ক্ষেত্রে কার্যকর হতে পারে না। ফলে দেশে আইন শৃঙ্খলায় অবহেলার দরুন ডাকাতরা গ্রাম-বাংলায় লুঠ-পাট চালাতে থাকে। নবাব ও কোম্পানি কোন পক্ষই এদের শায়েস্তা করার চেষ্টা করেননি। ফলে গ্রাম-বাংলা জনশূন্য হতে থাকে।

কৃষি ও শিল্প ক্ষেত্রে
অবনতি

দ্বিতীয়ত: দ্বৈত-শাসনের ফলে বাণিজ্য কৃষি ও শিল্প ক্ষেত্রে অবনতি ঘটে। বাংলার স্বাধীন নবাবী আমলে বহু বিদেশি ব্যবসায়ী ও পুঁজিপতি এদেশের পণ্য কিনে নিয়ে যেত। কিন্তু কোম্পানির নতুন বাণিজ্য নীতির ফলে এদেশের ব্যবসা ক্ষেত্রে ইংরেজদের একচেটিয়া প্রাধান্য প্রতিষ্ঠিত হয়। ফলে দেশীয় ও অন্যান্য বিদেশী ব্যবসায়ীরা বাণিজ্যে মার খান এবং দেশের রপ্তানি আয় সর্ব নিম্ন পর্যায়ে নেমে যায়। কেননা ব্রিটিশ সরকার ইংলন্ডে কমদামী মুর্শিদাবাদী রেশম আমদানি বন্ধ করে দেয় ইংল্যান্ডের বেশি দামী রেশম শিল্পকে বাঁচাতে। ফলে এদেশীয় কারিগররা ক্ষতিগ্রস্ত হয়।

আমিলদারী প্রথার উদ্ভব

তৃতীয়ত: দ্বৈত শাসন-প্রবর্তনের ফলে, বাংলায় 'আমিলদারী'-প্রথার উদ্ভব হয়। রেজা খান বিভিন্ন জেলার আমিলদের সঙ্গে চুক্তির মাধ্যমে রাজস্ব আদায়ের দায়িত্ব তাঁদের হাতে ছেড়ে দিতেন। যেহেতু আমিলদের চাকুরীর মেয়াদ ছিল স্বল্প মেয়াদী সেহেতু তাঁরা যেভাবেই হউক রাজস্ব বেশি করে আদায় করতো। কারণ জেলার যে জমিদার যত বেশি রাজস্ব দিতে পারতো আমিলরা তাঁদেরকেই রাজস্ব আদায়ের দায়িত্ব দিত। এতে করে জমিদাররা ইজারাদারে পরিণত হয়। ফলে বাংলার জনজীবন আমিলদারী ব্যবস্থায় ভীষণভাবে ক্ষতিগ্রস্ত হয়।

রাজস্ব আদায়ে অমানবিক
অত্যাচার

চতুর্থত: কোম্পানির কর্মচারী গোমস্তাদের ব্যক্তিগত ব্যবসা ও অত্যাচারের ফলে দেশের সম্পদ কমতে থাকে এবং পর্যায়ক্রমে ইংল্যান্ডে পাচার হতে থাকে; অথচ রাজস্বের হার প্রতিবছর বাড়তে থাকে। দেখা যায় যে পূর্ণিয়া জেলার বাৎসরিক রাজস্ব যেখানে মাত্র চার লক্ষ টাকা ছিল, সেখানে তা বেড়ে গিয়ে পঁচিশ লক্ষ টাকায় উন্নীত হয়। এমনিভাবে দিনাজপুর জেলার রাজস্ব বার লক্ষ টাকা থেকে বেড়ে গিয়ে সত্তর লক্ষ টাকায় উন্নীত হয়। সম্পদের অতিরিক্ত এই রাজস্ব সংগ্রহ করতে রেজা খানের উপর চাপ আসে। ফলে রাজস্ব সংগ্রহ করতে রেজা খানকে কঠোর ব্যবস্থা গ্রহণ করতে হয়। ফলে অনেক পরগনা হতে রায়তরা আমিলদের অত্যাচার সহ্য করতে না পেরে অন্য জায়গায় পালিয়ে যায় বা পেশা পরিবর্তন করে।

ছিয়াত্তরের মন্বন্তর

পঞ্চমত: দিউয়ানী ও দ্বৈত শাসনের চূড়ান্ত পরিণাম ছিল বাংলায় 'ছিয়াত্তরের মন্বন্তরের ধ্বংসলীলা (১৭৭০ খ্রি: ১১৭৬ বঙ্গাব্দ)। একদিকে দ্বৈত শাসনের দায়িত্বহীনতার ফলে বাংলার জনজীবনে অরাজকতা নেমে আসে, অন্যদিকে অবাধ লুণ্ঠন ও যথেষ্টভাবে রাজস্ব আদায়ের ফলে গ্রাম্যজীবন ধ্বংস হয়ে যায়। তদুপরি পরপর দু'বছর অনাবৃষ্টি ও খরার ফলে ১১৭৬ বঙ্গাব্দ অর্থাৎ ১৭৭০ খ্রিস্টাব্দে বাংলায় এক প্রচণ্ড দুর্ভিক্ষ ও মহামারী দেখা দেয়। টাকায় একমণ হতে চাউলের মূল্য বাড়তে বাড়তে টাকায় তিন সেরে এসে দাঁড়ালো। খোলাবাজারের খাদ্যশস্য বেশি লাভের আশায় কোম্পানির কর্মচারীরা মজুদ করা শুরু করে। ফলে খাদ্যের অভাবে মোট জনসংখ্যার এক-তৃতীয়াংশ মৃত্যুমুখে পতিত হয়। দলে দলে লোক খাদ্যের আশায় কলকাতা, ঢাকা ও মুর্শিদাবাদের দিকে ছুটে আসে। এই সময়েও খাজনা মওকুফ করা হয়নি।

ইংল্যান্ডের কৃষ্ণ মড়কের মতো ছিয়াত্তরের মন্বন্তর ছিল ভয়ঙ্কর সর্বনাশ। ফলে গ্রাম-বাংলা জনশূন্য হয়। এই দুর্ভিক্ষে সবচেয়ে বেশি ক্ষতিগ্রস্ত জেলাগুলো ছিল নদীয়া, রাজশাহী, বীরভূম, বর্ধমান, যশোহর, মালদহ, পূর্ণিয়া ও চব্বিশ পরগণা। বরিশাল, ঢাকা, ফরিদপুর, নোয়াখালী ও চট্টগ্রামে বিশেষ ফসলহানি না হওয়ায় দুর্ভিক্ষের প্রকোপ তেমন একটা ছিল না। তাছাড়া 'নাজাই' প্রথার প্রকোপ থেকে নিজেদের রক্ষা করার জন্য কৃষকেরা ভিটে মাটি ছেড়ে

বাংলায় দুর্ভিক্ষের ভয়াবহ
রূপ

পালায়। 'নাজাই' প্রথার অর্থ ছিল, কোন একজন রাজস্ব বাকী ফেললে সেই গ্রামের অন্য কৃষকদের সেই রাজস্ব দিতে হতো। মন্বন্তরের ফলে বহু কৃষক মারা পড়ায় তাদের বকেয়া রাজস্বের দায়িত্ব জীবিত কৃষকদের উপর বর্তায়। এই দায়িত্ব বহিতে না পেয়ে বহু কৃষক জমির স্বত্ব ছেড়ে পাইকে পরিণত হয়। সামগ্রিকভাবে কৃষির অবনতি ও অনাবৃষ্টির ফলে ১৭৭০ খ্রিস্টাব্দে অর্থাৎ ১১৭৬ বঙ্গাব্দে দেশে যে দুর্ভিক্ষ দেখা দেয় তা ইতিহাসে 'ছিয়ান্তরের মন্বন্তর' নামে পরিচিত। এ দুর্ভিক্ষের চিহ্ন বাংলায় প্রায় বিশ-পঁচিশ বছর পর্যন্ত বিদ্যমান ছিল।

দিউয়ানী শাসনের অবসান

দুর্ভিক্ষের এক পরোক্ষ ফল দিউয়ানী শাসনের অবসান ঘটে। কোম্পানির রাজস্বের আয়-কমে যায়। বাণিজ্যেরও মন্দা দেখা দেয়। তাই কোম্পানির স্বার্থ রক্ষার জন্য ও বাংলার কৃষি শিল্পকে রক্ষার জন্য বিলাতের পরিচালক সভা দ্বৈত শাসন লোপ করার সিদ্ধান্ত নেন এবং ওয়ারেন হেস্টিংসকে নির্দেশ দেওয়া হয় যে, এখন থেকে কোম্পানি যেন বাংলার রাজস্ব ও শাসনের প্রত্যক্ষ দায়িত্ব গ্রহণ করে।

দ্বৈত শাসন ব্যবস্থায় ভাঙ্গন

ক্লাইভের এই দ্বৈত শাসন ব্যবস্থায় একটি ভাল দিক ছিল এই যে, এটা মুঘল শাসন ব্যবস্থাকে অটুট রাখে। প্রথমে কোম্পানির কর্মচারীরা রাজস্ব ব্যাপারে কোন হস্তক্ষেপ করেনি। অন্তত ক্লাইভ যতদিন কোলকাতা ফোর্ট উইলিয়ামের গভর্নর ছিলেন ততদিন রেজা খান কৃতিত্বের সাথে মুগলী প্রথায শাসনকার্য পরিচালনা করতে পেরেছিলেন। কিন্তু ১৭৬৭ খ্রিস্টাব্দে ক্লাইভ স্বদেশে ফিরে গেলে তাঁর দ্বৈত ব্যবস্থায় ফাটল ধরে।

সার-সংক্ষেপ

পলাশীর যুদ্ধে বিজয়ের পর ইংরেজ বেনিয়ারা এদেশে আধিপত্য বিস্তারের যে প্রয়াস শুরু করেছিল, তাদের দিউয়ানী ও দ্বৈত-শাসন লাভের মধ্য দিয়ে তা পূর্ণতা লাভ করে। লর্ড ক্লাইভ এদেশে এক অভিনব শাসন ব্যবস্থা চালু করেন যার মূল উদ্দেশ্যই ছিল কোম্পানিকে শক্তিশালী করে সম্রাট ও নবাব কে ক্ষমতাহীন করে তোলা। এতে দিউয়ানী ও দেশরক্ষার ব্যবস্থা থাকে কোম্পানির হাতে এবং বিচার ও শাসনভার থাকে নবাবের হাতে। এরই নাম দ্বৈত শাসন ব্যবস্থা। এ ব্যবস্থায় কোম্পানি পেলো দায়িত্বহীন ক্ষমতা আর নবাব পেলো ক্ষমতাহীন দায়িত্ব।

দ্বৈত শাসন ব্যবস্থা এদেশের জন্য কল্যাণের চেয়ে অকল্যাণই বয়ে এনেছে বেশি। ক্ষমতা পেয়েই কোম্পানির কর্মচারীরা দেশের মানুষের উপর রাজস্বের জন্য নানাভাবে অত্যাচার ও উৎপীড়ন করতে থাকে। কিন্তু নবাবের হাতে কোন ক্ষমতা না থাকায় এর বিচার সম্ভব হয়নি। ফলে দেশের ব্যবসা, বাণিজ্য, কৃষি ও শিল্পের দারুন ক্ষতি হয়। সামগ্রিকভাবে কৃষির অবনতি, উপরন্তু, অনাবৃষ্টির ফলে ১৭৭০ খ্রিস্টাব্দে (বাংলা ১১৭৬ সনে) দেশে এক ভয়াবহ দুর্ভিক্ষ দেখা দেয় যা ইতিহাসে ছিয়ান্তরের মন্বন্তর নামে পরিচিত। অবশেষে এর কুফলের প্রেক্ষিতে ১৭৭২ খ্রিস্টাব্দে দ্বৈত শাসন ব্যবস্থা বিলুপ্ত হয়।

পাঠোত্তর মূল্যায়ন : ৫.৬

নৈর্ব্যক্তিক প্রশ্ন:



- বাংলায় নবাব ও ইংরেজদের দ্বৈত শাসন শুরু হয় —

| | |
|--------------|--------------|
| ক. ১৭৫৭ সালে | খ. ১৭৬৫ সালে |
| গ. ১৭৬৭ সালে | ঘ. ১৭৭০ সালে |
- ছিয়ান্তরের মন্বন্তরে বাংলার প্রাণ হারায় —


| | |
|-----------------------|-----------------------|
| ক. এক-তৃতীয়াংশ মানুষ | খ. এক-চতুর্থাংশ মানুষ |
| গ. এক-পঞ্চমাংশ মানুষ | ঘ. এক-ষষ্ঠাংশ মানুষ |

৩. কোম্পানিকে বাংলার রাজস্ব ও শাসনের প্রত্যক্ষ দায়িত্ব নিতে বিলাতের পরিচালক সভা নির্দেশ দেন —
- ক. লর্ড কর্নওয়ালিস কে খ. লর্ড ওয়ারেন হেস্টিংস কে
গ. লর্ড ক্লাইভ কে ঘ. লর্ড রিপন কে
৪. দ্বৈত শাসন ব্যবস্থায় নবাব পেলেন —
- ক. দায়িত্ব খ. ক্ষমতা
গ. অর্থ ঘ. দায়িত্বহীন ক্ষমতা



সংক্ষিপ্ত-উত্তর প্রশ্ন:

১. দ্বৈত শাসন বলতে কি বোঝায়?
২. দ্বৈত শাসনের ফলাফল কি হয়েছিল?
৩. ছিয়াত্তরের মন্বত্তুর সম্পর্কে ধারণা দিন।



চূড়ান্ত মূল্যায়ন-৫ : রচনামূলক প্রশ্ন:

১. পর্তুগীজরা উপমহাদেশে কিরূপ অপরাধমূলক কাজে লিপ্ত ছিল তা বর্ণনা করুন।
২. ইংরেজ-ওলন্দাজ বিরোধের কারণ কি ছিল? এ বিরোধের ফল কি হয়?
৩. পলাশীর যুদ্ধের কারণ বর্ণনা করুন।
৪. পলাশীর যুদ্ধে সুদূর প্রসারী প্রভাব কি কি ছিল? আলোচনা করুন।
৫. উপমহাদেশে ইংরেজদের আগমনের পটভূমি আলোচনা করুন।
৬. বঙ্গারের যুদ্ধের কারণ ও ফলাফল আলোচনা করুন।
৭. দিউয়ানী লাভের অর্থ কি? দিউয়ানী লাভের বিনিময়ে কোম্পানি সম্রাটকে কি দিয়েছিল?
৮. দিউয়ানী লাভের ফলে রাজনৈতিক ক্ষেত্রে ইংরেজদের কি লাভ হয়?
৯. দ্বৈত শাসন ব্যবস্থা বলতে কি বোঝায়? দ্বৈত শাসন ব্যবস্থার প্রভাব কিভাবে প্রতিফলিত হয়েছে আলোচনা করুন।



উত্তরমালা:

- পাঠ - ১ ⇒ ১. ঘ ২. ক ৩. খ ৪. গ
- পাঠ - ২ ⇒ ১. খ ২. গ ৩. খ ৪. ঘ ৫. গ
- পাঠ - ৩ ⇒ ১. গ ২. ঘ ৩. ক ৪. ঘ
- পাঠ - ৪ ⇒ ১. ক ২. খ ৩. ক ৪. গ
- পাঠ - ৫ ⇒ ১. ক ২. ঘ ৩. ঘ ৪. খ
- পাঠ - ৬ ⇒ ১. খ ২. ক ৩. খ ৪. ঘ